

## Jesucristo Juan Ōimani Keskara

*Afara afeskara ixiai anori Jesucristo Juan tāpimani*

<sup>1-2</sup> Efe yora mīshtichi, iskaratīa ē mato kirika kenexō fomai mā tāpinō. Ēkīa Juan ē mato kirika kenexō fomai. Nai mēraxō Epa Niospa Jesucristo yoini afe keskara a inōpokoaifo nāmānoafo a yonoxomisfo tāpimaximākai. Askafaito nikakī Jesús āfe ājiri ekeki nīchia. Anoxori ea ājirinī yoinō afe keskara ikimākai nāmānoafo. Ea ōimanaito mē ōia a inōpokoaifo xafakīakōi. Askaito ōikī ē kirika kenea a inōpokoaifo anori a Niospa Jesús yoia anorikōi mā tāpisharakōinō.

<sup>3</sup> Na ē mato yoiai ikataima. A inōpokoai ē mato yoiai na kirika ano. Nā ōikani fetsafori inimanōfo. Askatari a nikaifori chanīmara fakanax, afori ini-maxikani. Nā ē mato yoiai keskai mā samamashta iki. Ea nikasharakāfe.

*Juan a ichanāmisfo anoafo siete Nios yoiti pexe ano a ato kirika kenexō fomani tāpinōfo*

<sup>4-5</sup> Nā Asia mai anoafo a Nios Ifofaafo tii siete pexefo anoafo ē mato kirika kenexō fomai. A ē mato yoiai anori ōisharakōikāfe. Afetīama Epa Nios niyopaofinixakī iskaratīa nia. Epa Nios nīpanaka. Āfe Yōshi Sharari afe itiani. Nāskakē Epa Nios feta āfe Yōshi Sharapa, āfe Fake Jesucristo mato noikī mātō ōiti mēra mato shināmasharapainō afanā mātō ōiti fekaxtefanōma. Nāskakē nōko Ifo Jesucristo

Niospa meka noko yoimis chanĩmakõi. Jesúsfi Niospa Fakekõifekẽ retenifo. Mã retexõ maifafiafono Apa Niospa anã otofani anã nanakama. Fato fetsa askayomisma. Nãskaxõ Apa Nios fe rafexõ a xanĩfofo maitio anoafõ ato ìkixii xanĩfokõi ixõ. Aatofi noko noikõiakĩ, ãfe imi foax noko nãxoni Satanás chaka nõko ifo inõma. <sup>6</sup> Nõ aõnoax nõ Epa Nios afe yorakõi ixõ noko yonomapaiyai keskafakĩ nõ anõ. Nõ askai afe yorakõifo ixõ nõri yora fetsafo nõ kifixotiro Epa Niospa noko nikai. Nãskarafoskõi nõko Ifo Jesucristo noko imai. Nãskakẽ keyokõi yorafãfe aõxõ iskafakakĩ yoipakenakafo: “Aicho, tsoa fetsakai na Jesús keskarama. Nã fisti shara-finakõia. Ares fisti nõko Ifo nĩpanaka. Ares fisti keyokõi yorafo ato ìkipakenaka,” ixõ yoipakenakafo. Askapakexapainõ.

<sup>7</sup> Õikapo. Oa nai kõi keskara sharakõi nõko Ifo Jesús oaito keyokõi yorafãfe õixikani. Askatari a retenifãferi õikani, akiki rãfixikani. Oaito õikani keyokõi yorafo a Ifofamisfomafo, “¿Afeskakĩ nõ Jesús Ifofamismamẽ?” ikanax oiaxikani, shinãmitsakõixikani.

<sup>8</sup> Epa Niospa yoia: “Afara onifataima ã iyopaoni. Ëfi nĩpanakakĩ. Afetĩara na nõko mai keyoi eres fisti ã ato yoitiro. Nãskaxõ ã afama mĩshti famis. Akka ã niyopaoni. Nãskatari ã nĩpanaka,” ixõ nõko Ifo Niospa yoia.

*Nõko Ifo Jesucristo ãakõi oa namakẽ õiai keskara Juan õimani*

<sup>9</sup> Ëkĩa Juan, ã mãto ochikõi. Nãskax mãri Jesús Ifofaax mã efe yorakĩ. Askax mã aõnoax omiskõifikĩ, mã tenemis. Nãskariai ãri aõnoax omiskõifikĩ ã

tenei. Ë Niospa meka ato yoita Jesúsnoari ã ato yoimis. Ea nikakaspakakĩ, ãto xanĩfãfe sorarofõ ea achimaxõ, fakafã nakirafe ea ato nĩchimana ãfe nãsimã, ãfe ane Patmos ano. <sup>10</sup> Ë mato yoinõ, ea nikakãfe. Anoxõ iskafani. A Jesús otoni penata, nomĩkonõ, Niospa Yõshi Sharapa ea ãkixõ a ea tãpimapaiyai ea õimana. Oa namakẽ nõ õimis keskara xafakĩakõi ea õimana. Askata ea kachiorixori fãsikõi oa xãaiti keskarato ea yoiaito ã nika. <sup>11</sup> “Nã mĩ õiaifo fetsafo kenexõfe. A kirika kenexõ Jesús Ifofamisfo tii ato fomafe. A siete Nios yoiti pexe anoafõ Asia anoafõ ato fomafe, afãfe õinõfo. A Nios Ifofamisfo a pexe tii Efeso anoafõ fomata, Esmĩrnã anoafõ fomata, Pãrgamo anoafõ fomata, Tiatira anoafõ fomata, Sardis anoafõ fomata, Filadelfia anoafõ fomata, Laodicea anoafõfori nã mĩ õiaifo ato kirika kenexõ ato fomafe,” ea faa.

<sup>12</sup> Ea askafaito ã fesoakekafã ã õia tsõa ea yoimãkai ixõ. Ë õia siete oa rãpari efapa õta keskara oro ã õia. <sup>13</sup> Nãskai rãpari nakirafe feronãfake xanĩfo finakõia nia keskara ã õia. ãfe tari ãfe tãe fepokõia, ãfe sitorari orokõi aõ nonexemea ika. <sup>14</sup> Askata ãfe foo oxokõi. Askatari ãfe fero oa chii keskara xafakĩakõi. (Nãskarifiakĩ xafakĩakõi Jesús noko õitiro a nõ shinãi keskara.) <sup>15</sup> Askatari ãfe taeri chaxasharakõia ika. ãfe mekari oa oi kaya feaito nõ nikamis keskarakõi. <sup>16</sup> ãfe põya kayakai aõri ãfe mifi kamaki siete fishi keskara ika. ãfe ana kenõ chainipa keskara aostamea ika. Askatari ãfe femãnã fafekõi oa xini nõ õimis keskara ika.

<sup>17</sup> Nãskara õi ã pakea, oa nai keskara. Ë askaito õikĩ ea ramã ãfe mifi kayakai aõxori. Ë askaito ea yoia iskafakĩ: “Rateyamafe. Ë Jesúski. Afara

onifataima ã iyopaoniki. Ëfi anã nanakamaki. <sup>18</sup> Iskaratĩari ã nia. Mẽ nafianixakĩ, iskaratĩa ã nia. Ë anã nanakama. Ë anã afeska pishta nakama. Eres fisti ã ato namata, chiifã mẽra ã ato potatiro a ea nikakaspamisfo. <sup>19</sup> Nãskakẽ a mĩ taefakĩ õiafo kirikaki kenefe. Askatari na mĩ iskaratĩa õiaifori kirikaki kenefe. Askatari a chipo ixiaifori kenefe. <sup>20</sup> Ë mia yoinõ afeskai siete fishimẽ ãfe mẽke kayakai aõri; askatari afeskai siete rãpari oro keskara otamãki. Na siete fishi mĩ õiai nãato noko shinãmamis siete Niospa meka yoimisfo Nios yoiti pexe mẽranoa ichanãmisfo. Askatari nã siete rãpari keskara mĩ õiai nãatori noko shinãmamis siete Nios yoiti pexe mẽranoax ichanãmisfo Nios Ifofakanax,” ixõ ea faa.

## 2

### *Jesús a Ifofaafõ Efeso anoafõ ato yoini taekõifakĩ*

<sup>1</sup> Jesús ea yoia iskafakĩ: “Efeso anoxõ a ea Ifofaafõ a ato Niospa meka yoimisto na kirika ato anexonaito nikanõfo, iskafakĩ kenexõfe: ‘Ëkĩã mãto Ifo Jesús keyokõi yorafo ãfe Epa Niospa meka yoimisfo ã ato kexetaifaa. A ã mato yoiai anori ea nikasharakõikãfe. <sup>2</sup> A mã ikai keskara mẽ tãpia, mẽ mato õi. Mãfi eõxõ fãsi yonosharakõimiskĩ. Afara fetsa afeskara afiaito mã tenekõimis. A yorafãfe afarafo chakafamisfo anorikai mã tãpipaimisma. Akiki mã inimapaimisma afara chakafaifono, nãskax mã ato fe rafekaspamis. Yora fetsafãferi mato yoikĩ iskafakani: “Cristo ea nĩchia ã mato yoinõ,” ixõ mato yoiaifãfe, “Nõ ato nikayonõ,” ixõ mã ato nikataifaa. Fanĩrira mato yoiaito anã chanĩki yoimara mã faima mẽ mato õia mã

askafaito. Anorima yoi ãa chanĩmisfo mã mã tâpia. <sup>3</sup> Nãskax mã eõnoax omiskõikĩ mã tenemis ea potakaspakĩ. <sup>4</sup> Mã anori shara shinãfimiskẽ ã anã meka fetsari yoinõ. Taefakĩ mã ea noiyoaonixakĩ anã iskaratĩa mã ea anã noisharaima. Mã mã ea shinãmaki fetsea. <sup>5</sup> Shinãsharakãfe a mã taefakĩ shinãyopaoni anori. A ea noikĩ mã taefani keskafakĩ anã ea noikãfe. Askatari mã ranã mã nõinãyopaoni keskakõikãfe. Akka mã ea tanaima, oa chii nokaito nõ anã kētefatiro keskafakãfe ea shinãkĩ. Mã ea Ifofasharayamainokai chipo tsõa anã mato tanaima. Mã ichanãi ano anã tsoakai mato fe ichanãima. <sup>6</sup> Mã askafixõ afara fetsa mã shara famis. A feronãfake ãfe ane Nĩkoraita fanĩrira yoiaito nikakakĩ atirifãfe mato anoxõ nikakaxõ, afãferi chakafamisfo keskafakĩ ãri ato noikaspai. A ã noikaspai keskafakĩ mãri efeta noikaspai. <sup>7</sup> Mã pachoyakĩ ea nikakõikãfe. Niospa Yõshi Sharapa mato yoiaito nikasharakõikãfe. Satanás mato fanĩrira shinãmapaimiskĩ. A Satanás finõinĩfofã ea kachikiri fatama ea Ifofasharakõiaito, aafi Epa Nios ano ã ikimaxii efe isharapakexanõ, ” ixõ Jesús ea yoia anori Efeso anoafõ a chanĩmara faafo ato ã kenexonõ.

### *Jesús Ifofaafõ Esmĩrnã anoafõ ato yoini*

<sup>8</sup> Anã Jesús ea yoia iskafakĩ: “A ea Ifofamisfo Esmĩrnã anoafõ a ato Niospa meka yoimis ã yoinõ ea kirika kenexõfe iskafakĩ: ‘Èkĩa mãto Ifo Jesús ã mato yoi mã tâpinõ. Ea nikasharakãfe. Nã afama mĩshti onifataima ã iyopaoni. Iskaratĩa ã nĩpanaka. Mẽ nayofinixakĩ ã anã nanakama. ã mato nonori yoi iskafakĩ: <sup>9</sup> Mã omiskõiaito mẽ õi. Askatari mã afaayafoma. Mã askafiaino ã mato fe ikano, ea

keskarari mā shara itiro. Mē tāpia matoōnoa yora fetsafāfe meka chakayoiaifāfe. “Nō judeofo, nō Nios Ifofamis,” ikaxō yoiaifo afokai efe yorafoma. Afofi Satanás yorafoki. <sup>10</sup> Akka a inōpokoai ē mato yoinō. Satanás ifoafāfe fatora fetsa fisti mato karaxa mēra ikimaxikani mā ea shināmakimākai ōixikakī. A mato mesenifaifono rateyamakāfe. Ea shināmakitama nonori shinākāfe iskafakī: “Ea retefiaifono ē meseima, ē Nios ari kai. Ēfe Ifāfe ea potanakama. Ē ēfe Ifo noikī finakōifafāini,” ixō yoikāfe. Mā askax, nakē, ē mato ĩkipakenaka mā efe ĩpaxanō. <sup>11</sup> Mā pachoyakī nikasharakōikāfe Niospa Yōshi Sharapa mato yoiaito mā Jesús Ifofakī. Fetsa omiskōifikī ea shināmakiyamaito Satanás afeskafatiroma. Nāskax naax a omiskōipakenakafo mēra katiroma,” ixō anori Jesús ea yoia a Ifoafāfo Esmīrnā anoafō ē ato kenexonō.

*Jesús Pérgamo anoafō a chanīmara faafō ato yoini*

<sup>12</sup> Anā Jesús ea yoia iskafakī: “A ea Ifofamisfo Pérgamo anoafō a ato Niospa meka yoimis a ē yoipaiyai anori ē yoinō ea kirika kenexōfe tāpinōfo. Iskafakī kenefe: ‘Ēkīa mātō Ifo Jesús ē mato yoi mā tāpinō. Ēfe meka oa keno chainipa takairafe ikikōiai keskaraxō, ēfe mekapas a ea noikaspaifo tii ē ato chakafatiro kopikī. <sup>13</sup> Mē tāpia a pexe rasi Pérgamo ano mā ika. A Pérgamo anoafāfe Satanás nikakōikani. Askaito ōi mā mesemisma, ea Ifosharafai. “Jesús nōko Ifokōi,” ixō mā ato yoimis. A ea Ifofamis fetsa āfe ane Antipas eōnoa ato yoimis ōikī mā reteafō noikaspakakī. Mā reteafāfe ōifiax mā atoki meseima, mā ea chai faama. Mātō ōiti mēra

mã shinãsharakõi. “Noko retefiaifonokai nõko Ifo Jesús nõ chai faima,” ixõ mã yoimis. Anori mã shinãi sharakõi. <sup>14-15</sup> Akka nãno afara fetsa a sharama ẽ mato yoipai. Fatora mã fetsa a Balaam afara chaka yoini keskara mã shinãmakikaspai. Akka taeyoi xanĩfo Balac israelifo chakana famapaini. Nãskaxõ Balaam yõkani: “¿Afeskaxõ mĩ kaifo ẽ ato chakana famatiromẽ?” faito, Balaam kemani iskafakĩ: “Mĩ ato yoitiro mĩ fista mẽra ato ikikixiki. Nã mã akai keskarari akairi anõfo. Nã nõko niosra ixõ afara onifaxõ a mã piã mã inãmis. Nã israelifãfe pikanax chakananõfo mãto fista mẽranoax. Askatari ãto ãfima fe ikanax chakananõfo,” fani. Iskaratĩari nãskarafori mã fisti rasi chakanafo nã Nicolaitafãfe ato afara chaka tãpimanaifo keskara ikafo. <sup>16</sup> Nãskakẽ anã iskaratĩa askafayamakãfe. Nios Ifokãfe, anã shinãkãfe. Mãto chaka xatekãfe shinãmitsayanã. Akka mã chaka xateyamaito, ẽ matoki samamashta nokoxõ ẽfe mekapa ẽ mato kopikĩ chakafatiro mã omiskõinõ. Ẽfe mekafi oa keno ikiai keskarakõikĩ. <sup>17</sup> Mã pachoyaki ea nikakãfe. Niospa Yõshi Sharapa eõnoa mato yoiaito, nikasharakãfe. Satanás mato chakafamapai. Fẽtsa Satanás nikayamaxõ ea kachikiri faamano, nã ẽ kexesharaxii nã ẽfe Epa israelifo kexesharani keskafakĩ. Shinãkapo. Epa Niospa israelifãfe ãto xinifo a piaifo ato inãni fonãikaifãfe afaa piamaifãfe Epa Niospa nai mẽraxõ ato põtani oa misi keskarafo ãfe ane mãnã nã pinõfo ato põtapaoni pena tii ato noikĩ. Nãskafakĩri nã ea chanĩmara faafo ea Ifo sharakõi faifo ẽ ato inãxii ẽfe Yõshi Shara isharapakexanõfo. Ea õiyamafiaifono pena tii ẽ ãto õiti xafasharakõi

faxotiro. Askatari mā ea Ifo sharafaifono isharakōiyānā mā ea chanīmara faino, akka ē mato ane fetsafaxōi tsōa tāpimisma, nā fiai fistichi tāpitiro. Tokiri oxosharakōikī nā tokiriki mā mātō ane kenea mātō ane fena ē mato ināxii. Nāskakē ea tāpisharakōixikani. Mā ōitisharayakōi ixii,” ixō Jesús anori ea yoia a chanīmara faafo Pérgamo anofo ē ato kenexonō.

### *Jesús a Tiatira anofo a Ifofamisfo ato yoini*

<sup>18</sup> Anā Jesús ea yoikī iskafaa: “Ea Ifofoafo Tiatira anofo Niospa meka ato yoimis a ē yoipaiyai anori ē yoinō ea kirika kenexōfe iskafakī: ‘Ēkīa ē mātō Ifo Jesús ē mato yoisharapai mā tāpinō. Ēfe fero oa chii xoisai keskara. Nāskakē ē mato tāpikōia. Ēfe taeri nā keno fakka fakka ikai keskara. Nāskakē ē mato yoikī iskafai: <sup>19</sup> “Mē mato tāpia, nā mā afara shara famis. Mā nōinākōi. Askatari mā ea chanīmara faxō mā ea Ifokōi famis. Nāskakē fetsafori mā noisharakōimis ato kexesharayanā. Mā omiskōifikī eōxō mā tenekōimis. Mā ea chanīmara fakī taefanitīa mā fetsafo sharafamis. Nāskakē iskaratīari mā ato noisharataifaa. <sup>20</sup> Mā mā askafimisno afara fetsa ē mato yoinō a ē fichipaiyaima mā anā fichipainōma. Akka kēro fisti mato fe ichanāxō, ‘Ē Niospa meka ē mato yoinō, ea nikakāfe,’ ixō mato yoipaikī, ēfe mekakōi mato yoima. Nā kēro Jezabel fanīrira mato yoikī āa mato pāramis. Mā Jesús Ifofafiamiskē mato pāramis iskafakī: ‘Mātō āfimafo chotakāfe; kērofāferi mātō fenemafo chotamakāfe,’ mato famis. Askatari mato yoimis iskafakī: ‘Afara fetsa yora fakaxō, nā nōko niosra ixō, a mā piai ispaxō nōko nios nō ināira ixō, ano fisti ichanāxō, mā pitiro,’ ixō



na kēro Jezabel mato yoikī mato pāramis. <sup>21</sup> A kēromā fanīrira mato yoimis mē yoitaifamis anā chakafanōma. Ē yoifaitokai āfe chaka xatepaima. <sup>22</sup> Ē yoifiaino ea nikayamaito ōikī ē isinī imaxii rakatsax omiskōinō. Askata a fetsafori a keskara a sharashināifoma āto chaka xateyamaifāfe ē ato omiskōimani. <sup>23</sup> A kēromā shināi keskarari shināifo ē ato retexii. Ē askafaito, ōikani a ea Ifofamisfo mai fetsafo arixō tāpitirofo ē keyokōi yorafo ē tāpisharakōia. Māto ōitinī a mā shināi anori mē tāpikōia. Tsōakai afaa pishta ekeki onetiroma. Ē keyokōi tāpikōia. Nāskakē mā afarafo shara famis ē mato shara faxii kopifakī. Akka a afarafo chakafamisfo ē ato omiskōimaxii kopikiri. <sup>24</sup> Efe yora mīshtichi Tiatira anoafāfe, mā atiri nā kēromā mato fanīrira yoipaiyai anori mā nikamisma. Satanās ato tāpimamis keskara mā anori shināpaima. Askara shara. Nāskakē ē anā mato afaa fetsa yoima. <sup>25</sup> Nāskakē ē anā fistiri mato yoi. Na eōnoa mā tāpimis anori shināmakiyamakāfe. Ē mato ifiyoai mā eōnoa tāpimis anori shināmakipaiyamakāfe. <sup>26-28</sup> Fētsa Satanās finōkōixō, ea fisti Ifokōifaax mā naax nā efe nīpanaka. Ē ato xanīfo imaxii. Epa Niospa ea xanīfokōi ima keyokōi ē ato ikinō. Nāskarifikī ē ato xanīfo imatiro efeta na maitio anoafō ato ikinōfo, mitsisipakōixō. Akka a fetsafāfe ēfe meka shara nikakaspaifāfe nō ato omiskōimaxii. Oa nō kesho kerexkai nō yamī moshaino moshitiro keskara afeskaxō nō anā shara fatiroma. Nāskarifikī nā nikayospamisfo nō ato omiskōimanaitīa tsoa pishta ato timamatiroma nanōfoma. Mā penaino, fishifā fisti fafeaito, keyokōichi yorafāfe ōitirofo. Aa

keskara ã anã oxii ea õisharanõfo. Ë anã nokoxõ, ã ato yoixii nã ea Ifofamisfo efe isharapakexanõfo. <sup>29</sup> Mã pachoyakĩ ea nikasharakãfe. Niospa Yõshi Sharapa mato yoiai keskara nikasharakãfe,” ” ixõ Jesús anori ea yoia a Ifofaafo Tiatira anoafõ ã ato kenexonõ.

### 3

#### *Jesús Sardis anoafõ a chanĩmara faafõ yoini*

<sup>1</sup> Askata anã Jesús ea yoia iskafakĩ: “A ea Ifofamisfo Sardis anoafõ a ato Niospa meka yoimis a ã yoipaiyai anori ã yoinõ ea kirika kenexõfe iskafakĩ: ‘Ëkĩa mãto Ifo Jesús ã mato yoi mã tãpinõ. Niospa Yõshi Shara efe ika. Ëfi Nios yoimisfãfe ãto xanĩfokõiki. Ë mato yoi iskafakĩ: Mã ika keskara mẽ tãpimis. Yorafãfe matoõnoa iskafakĩ yoimisfo: “Nafo shara ikafo. Na Sardis anoafãfe mã Jesús Ifofakõinafo,” ixõ matoõnoa yoimisfo. Mã isharamis keskara õikani. Mãri shinãmis iskafakĩ: “Nõ shara ikara” ifiax mã shara ikama. Mã ea Ifofasharakõiama. <sup>2</sup> Akka mã mã ea shinãmakia, Askakakĩma, anã a mã shinãyopaoni anori shinãkãfe. Mẽ tãpia Epa Niospa mato imapaiyai keskara mã isharakõiama. Ë mato yoiai keskara mã akama. Mã eõxõ asharayopaoni anã iskaratĩa mã anã askafaima. Mã ea shinãmakipai. Nãskakẽ afianã ea shinãsharainĩfofãkãfe. <sup>3</sup> Nã mã ãfe meka mãto õiti mẽra mã shinãyopaoni keskafakĩ anã shinãkãfe. A mã chakafamis keskara shinãkakima; ea Ifo shara fakãfe. Akka mã ea shinãyamaito ã matoki samama nokorisatiro mato omiskõimaxiki. Oa yometso tsõa tãpamano ãto pexe mẽra ikirisatiro keskai, ã matoki nokorisataxii mato

omiskōimaxiki. <sup>4</sup> Askafiax a mato fe ichanāmisfo fisti rasi a Sardis ano ikafāfe chakafamisfoma. Nōko rapati choshtakōi nō pekaxō fatiro fetsa fena shara safexiki. Nāskafakīri atirito mā chaka shināpaoni keskara mā anā shināima, mā mā pota. Nāskaxō mēstekōi mā eōnoa shināi. Nāskaxō rapati fenasharakōi keskara ē mato ōitiro. Mā askano, mā ea ano nokoaito ē mato rapati oxokōi sharakōi ināxii mā efe ĩpaxanō. Mā isharakōimixsakī mā efe rafepakenaka. Nā ē keskara shara ixikāki. <sup>5</sup> Tsoa ēfe meka shināmakitama ea Ifofakaxō, eōxō Satanás finōkanax afo efe isharakōipakenakafo. Afori ē ato rapati oxokōi sharakōi ināxii. Askaifāferi ēfe Epa Niospa a ea Ifofaafo tii āto ane tii kirikaki kenea. Nāskaxō āto ane kenea kirikaki a ea Ifofaifāfe tāpinōfo efe nīpaxakāki. Askaifāfe ē āto ane soanakama. Epa Nios feta āfe ājirifāfe ōiaifono ē ato yoixii iskafakī: “Nafofi efe yorafokī,” ixō ē ato yoixii. <sup>6</sup> Mā pachoyakī ea nikasharakāfe. Niospa Yōshi Sharaōxō eōnoa a ea Ifofaafāfe yoiaito nikasharakōikāfe,’ ” ixō anori ea Jesús yoia a Ifofaafo Sardis anoafō ē ato kenexonō.

*Jesús Filadelfia anoafō a chanīmara faafō yoini*

<sup>7</sup> Askata anā Jesús ea yoia iskafakī: “A ea Ifofaafo Filadelfia anoafō a ato Niospa meka yoimis a ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Ē afaa pishta chakafamisma. Ē sharafinakōia. Ēfe meka chanīmakōi. Nā fichipaiyai afama mīshti sharafo āfe pexe ano fapaoni, xanīfo David. Akka āfe pexe fepoti chamisyano tsoa ikitiroma ipaoni, chamis- maisax. Akka ato ikimanaino ikitirofo. Akka ato ikimayamaino tsoa ikitiroma. Nāskarari mā Nios

ano ikipai mā ikitiroma ē mato ikimayamaino ēmāi chamis keskaraxō. Akka ē mato ikimanaino mā ikitiro Nios ano. Akka fetsafāfe ikikāfe mato faifono mā Nios ano ikitiroma. Eres fistichi ē mato ikimatiro. <sup>8</sup> A mā imis keskara mē tāpia. Mā yora ichapayamaflaxō mā shināsharakōimis. A ē yoimis keskara mā ato tāpimatiro a mā amis keskara eōnoa. A ē yoimis anori tsōa mato xītitiroma. Yora fetsafāfe mato yoiaifo mā metsanima. Mato askafafiaifono ēfe meka mā shināmakimisma. “Na Jesús nōko Ifo,” mā ea famis. <sup>9</sup> Fetsafāfe chanīkākī mato yoimisfo iskafakī: “Nō judeofo,” ixō mato yoimisfo. Afokai Niospa afe yorafoma, Epa Nios chanīmara faxoma. Afāfe Satanās ifofamisfo. Nāskakē ēfe Epa fe nō āto kaifoma. Afofi āa chanīmisfo. Shinākāfe. Nā yorafo ē ato yoimaxii iskafakī yoinōfo: “Nōkai shara shināima. Nō afama. Chanīma, Niospa āfe Fake mato noisharakōimis,” ratokonō mai chachikaxō iskafakī mato yoixikani. <sup>10</sup> A ē mato yoimis anori mā isharakōia omiskōifikī mā tenekōimis ēfe meka nikakatsaxakī. Mā eōnoax omiskōifikī mā tenekōimis. Nāskakē mā ea shināmakimismano ē mato kexesharaxii a omiskōiai nokoaino nā maitio. Keyokōi omiskōixikani ea Ifofayamakanax. <sup>11</sup> Ē anā samama oxii matoki. Ea shināmakiyamakāfe. Mā ea Ifofakī ea chaifayamakāfe. Mā ea chaifayamaino eōxō Epa Niospa mato ināpaiyai keskara mato ināi fetsafāfe finōfoma. <sup>12</sup> Fetsa omiskōikī ēfe meka shināmakitama tenekōifai ea Ifo sharakōi faxō ato Satanās finōkōia. Nāskakē a ēfe Epa Nios ika ano, ē ato imasharapakenaka. Anoax anā faki fonakafoma. Nāskakē ē afo tāpimaxii afomāi Epa Niospa yorafokē. Askaxō ē ato yoixii iskafakī:

“Nono Epa Nios ikano, nofe mā ipanaka,” ē ato faxii. A Niospa yorafo, judeofo, Jerusalén ano ipaonifo. Akka iskaratīa Epa Nios ika ari Jerusalén fena. Jerusalén fena nai mēra. Nai mēra ifiax, chipo nāmā fotoxii. Akka fetsafo ea shināmakikanaxma afo ano ipanakafo. Nāskakē fotoxō ēfe Epa ane ē atoki nētaxii. Askatari Jerusalén fenapa aneri ē atoki nētaxii. Askatari ēfe ane fenari tsōa nikayomisma ē atoki nētaxii keyokōichi tāpinōfo ē āto Ifokē. <sup>13</sup> Mā pachoyakī ea nikasharakōikāfe. A Niospa Yōshi Sharapa ato shināmanaino yoiaifo anori nikasharakōikāfe,’” ixō Jesús ea anori yoia a Ifofafo Filadelfia anofo ē ato kenexonō.

*Jesús Laodicea anofo a chanīmara faafo ato yoini*

<sup>14</sup> Askata anā Jesús ea yoia iskafakī: “A ea Ifofafo Laodicea anofo a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Epa Niospa ea amapaiyai keskara ē fakatsaxakī āfe meka yoinō. Epa Niospa yoipaiyai keskara ē keyokōi yoimis. Ē chanīkima yoimis. Epa Niospa onifani tii keyokōi ēfi āto xanīfokōikī. Ē mato iskafakī yoi: <sup>15-16</sup> Mā amis keskara mē tāpia. Ea kachikiri fayamakaxō akka askafixō ē mato amapaiyai keskara mā fichipaikōiama. Askara sharama. Afara matsishara nō nīskakī nō inimayanā nō ayatiro. Askatari afara xana shara mā matsikē nō inimayanā ayatiro. Askafixokai afara katsa nō inimayanā ayatiroma. Katsa meei nō anāpaketiro. Nāskarīfiai ranāri yorafo afara xana

keskarafo. Ea Ifo sharakōi faafo. Akka ranāri afara matsi keskarafo. Ēfe meka tāpisharafoma. Ē atoōnoax rafaṅā ikōini. Askafiakx kai mā kai xana yafi matsi keskarama. Mā katsa keskara. Afara katsa meekī nō anāpaketiro keskara ēri mato askafai. Nāskakē ē mato potaxii oa ē anāpakeai keskafakī. <sup>17</sup> Akka mā yoimis iskafakī: “Ē afara ichapaya. Ē afaa yopaima. Ē Niospa mekari tāpifinakōia,” ixō, anori mā yoiflax mā tāpiama mā chaka imis. Ooa. Ea mā yopafikī mā kakapaimis. Niospa āfe Yōshi Sharapa mato imapaiyai keskara mā ikama. Mā katsa keskarakī. Mā imis keskara mē tāpia. Akka ē kai askara fichipaima. Askafixō ē matoōnoa shināi keskara mā kai tāpiama. Mā nā fēxo keskarafo. Fēxo afara ōitiro. Nāskarifiāi māri ēfe mekakōi nikasharamisma. Mā yora chitoria keskarafo. Akka mā tāpiama mā chitoria keskara. Yora chitoriato rapati yopai chitoria ixikima. Nāskarifiakī mā ea yopaima keskara ea yopafikī. <sup>18</sup> Akka ē mato yoisharapai mā afara chakafamis keskara mā anā anōma. Ea yōkakāfe ē mato tāpimanō afeskax mā ea keskara itiomākī. Eres fisti ē mato imasharatiro. Akka mā chitoria keskara. Akka ē mato rapati safemasharatiro mā anā rāfinōma. Akka rapati ē mato yoitamaroko mā afara chakafamis ē mato yoi. Akka ē māto ōiti fetsafaxotiro ea keskara shara mā inō. Akka a afara mā chakafamis ē xafakīa ōia. Mā fēxo keskarakōi imis. Nāskakē ea yōkakāfe ē mato sharafanō, ēfe meka ē mato tāpimasharanō. <sup>19</sup> Akka ē mato noiyamakī ē anori mato yoikeranama. Askatamaroko ē mato keyokōi noikōi. Nāskakē ē mato omiskōimatiro tāpimakī mā chaka xatenō.

Nāskaxō nāfori ẽ ato yoisharapai ea Ifo shara fanōfo. Akka a mā chaka shināmis keskara anā shināyamakāfe. Iskaratīa ẽfe meka nikakōikāfe ẽ mato yoiai keskara axikakī mātō chaka xatekāfe. <sup>20</sup> Shinākapo efe yora mīshtichi. Akka a yora pexe mēra ikipaikī ikisi pexe ifo kenatoshitiro pexe ifāfe ikimanō. Nāskarifiāi ẽ mato ano nokoxō mato yoikī iskafaxii: “Ē mefe rafepai,” ixō ẽ mato yoimis. Fētsa āfe shinā mēraxō ea nikaxō ea yoi: “Ifo, emēra ikife. Ē mia fichipai,” ixō anori yoiaito ẽ a mēra ikiax ẽ afe rafei. Ari efe rafei. <sup>21</sup> Fētsa afara chakafakī xatexō ea Ifosharafai nā ẽfe Epa Nios ika ano efe ipasharatiro. Nāato Satanás finōa. Ēfi xanīfokōikī ari efe xanīfo itiro. Ē Satanás yafi niafaka chakafo finōkōia. Ēfe Epa Nios ika ano afe xanīfokōi ẽ ika. Nāskarifiāi fētsa āfe chaka kachikiri fakī, ea Ifosharafaxii ẽ ika anoax ari efe xanīfo ipaxatiro. <sup>22</sup> Mā pachoyakī ea nikakāfe. Niospa Yōshi Sharapa ea yoiai keskara nikasharakāfe,’ ” ixō ea anori Jesús yoia a Ifofaafo Laodicea anoafo ẽ ato kenexonō.

## 4

<sup>1</sup> Akka nā ea taefakī yoia, mē kenekī mitoano, ea anā yoiaito ẽ nika. Ea iskafaito ẽ anā ōia nai mēraxō oa pexe fepoti fepekemea keskaraxō. Ē nika afia ẽ nika keskara xāaiti āfe oi efapa keskarato ea yoia anā ea iskafakī: “Niri ekeki māpeferafe,” ea faa. Oa namakē ōia keskara ẽ ōia ea iskafaito: “Nafo ẽ mia ispanō nafo afarafo chipo ixiaifo ẽ mia ispanō,” ea faa.

<sup>2</sup> Ea askafaito samama Niospa Yōshi Sharapa ea ōimana āfe tsaoti efapa sharakōi ea ōimana a

xanĩfãfe tsaoti ano tsaokẽ ã õia. <sup>3</sup> A ã õimismafo ã õia sharakõifo. Nãskakẽ ã tâpia. Nioskõirokomẽ ã faa. Askaito ã õia fafesharakõiaito. Iskara ã õia. Tokiri rafe ãto ane jaspe fe cornãlinã nã rafesharakõĩ fakka fakka sakõini. Nãskara ãfe femãnã ã õia. A ãfe tsaoti ano oa nãfa fai nana keskara ã õia fafesharakõiaito. <sup>4</sup> Nã nõko Ifo tsaoa ano a kematai veinticuatro tsaotifo ã õia. A tsaoti kamaki feronãfakefo tsaoafo ikafo. Nã feronãfakefo Jesús Ifofamisfo ikafo. Afãfe nã ato chanĩmara faifo ato kexemisfo ipaonifo. ãto rapati oxo sharakõifo mãmãĩ ato Niospa ãfe chaka soaxonikẽ. Askatari xanĩfãfe maiti keskara oro sharakõĩ safeafo ika. <sup>5</sup> A ãfe tsaoti anoax kana peeitaitani oa kana piishikai keskara a mẽranao ã nika. A fesoa anori siete rãpari xofisaito ã õia. A ã õiaino Epa Niospa ea shinãmana iskafakĩ: “A Epa Nios tsaoano rãpari otaito ã õia keskara, nãskarifikĩ Epa Niospa ãfe Yõshi Shara nokoki nĩchiarokomẽ nofe rafenõ,” ixõ ã shinã.

<sup>6</sup> Askatari a fesoa anori oa fakafã keskara fakka fakka ikaito ã õia, oke mẽra xafakĩakõĩ ika. Askatari a nõko Ifãfe ãfe tsaoti ano a onifanifo cuatro ano niafo ika. Askai fero ichapayafo. Takairafe fero neeafo. <sup>7</sup> Oa poomã femãnã keskara fetsa ita, fetsari oa fakka fene femãnã keskara ita, fetsari oa yõra femãnã keskara ita, fetsari oa tete yoyai keskara ika. <sup>8</sup> Askakani ãto pei ichapa seis ika, fisti rasi pei ichapayafo. Askai ãto fero rasi ato neei fetsea ika. Penachãĩ fanãita, fakishchãiri fanãiki xatepakenakafoma. Fanãiyana iskafakani:

Sharafinakõia, sharafinakõia, sharafinakõia, nõko Nios sharafinakõĩ. Nõko Niospa afama mĩshti famis nã apaiyaifo. Epa Nios niyopaofinixakĩ, nãskakẽ iskaratĩa nia. Askatari



Epa Nios afeska pishta nakama,  
ikax fanāikaifo.

<sup>9-10</sup> Nāskakē aōnoax fanāikaifo iskakani: “Epa Niosi, mī fisti nōko Ifo. Fato fetsakai na mī ikai keskarama. Mīfi nīsharapakenakaki. Mī sharakōi. Mī afaa pishta chakafamisma. Mī askaito nō mia Ifofasharakōi. Aicho Epa Niosi. Fato fetsakai mia keskarama,” ixō Nios fanākafo. Mā askafono nā Jesús Ifofamisfo veinticuatro xanīfofo nōko Ifo Nios āfe tsaotiki tsaono a nāmā feopakefofānafo. Feopakefofākata, āto maiti tsekakata feofafo Nios nāmā māmāi askafakatsaxakakī. Nāskaxō yoiāfo iskafakakī: “Nōko Ifo Nios mī noko maiti inā keskari fakī nōri miari mini. Mī noko ināfikē nō mia fāsi noikī na maitifo nō mia mini. Meres fisti mī noko ĩkitiro. Mī noko ifimis. Akka mī nōko Ifokōi itiro. <sup>11</sup> Mī afaa chakafatamaroko mī sharakōifamis. Akka mīōnoa fisti nō yoitiro iskafakī:

Mī nōko Ifokōi. Mī nōko Nios. Tsoa fetsakai mia keskarama shara. Mī isharapakenaka. Mīkai afaa chakafamisma. Nāskakē nō mia fāsi noi. Mī shināmās mī afama mīshti fatiro. Mī keyokōi onifani. Mī apaiyai keskara mī keyokōi onifani ato nimapakexakī,”

ixō nā Jesús Ifofamisfāfe veinticuatro xanīfofofāfe yoisifo.

## 5

*Jesús kirika kataramea tsomaxō ato yoiyoni afeskaximākai chipo*

<sup>1</sup> Askata ē anā ōia oa ēfe namapa ōia keskara nā ē mato yoinō. Nā mifi kayakai aōri nōko Ifo Nios tsaono ē ōia kirika kataramea takai rafe

kenea ě ōia, siete taxtati aō neekē. <sup>2</sup> Niospa ājiri finasharakōia ě ōia. Fāsikōi mekayanā iskafakī yoia: “Na kirika taxtatinī taxta afeskaxō tsōa ōitiroma. Nā xanīfo afaa chakafamisma fistichi fēpetiro ōixii. ¿Fato xanīfāfe afaa chakafamismato fēpetiromē nō ōinō?” ixō yoia.

<sup>3</sup> Askafixō tsōa fēpetiroma nai mēranoa ikafāferi fēpetirofoma. Askatari a nāmā ikafāferi, Niospa ājirifāferi fēpetirofoma a mēra ōixikakī. <sup>4</sup> Nāskakē ě oiai finakōiyanā iskafakī yoia: “¡Ooa! Xanīfo afaa chakafamisma tsōa fichiama na kirika noko fēpexopanā a mēra nō ōipanā,” ixō ě shinā. <sup>5</sup> Askata nā veinticuatro xanīfofōfāfe Jesús Ifofamis fētsa ea iskafaa: “Oiyamafe. Ōipo. Nōko Ifo oa ono nia. Cristo fisti nōko xanīfo finakōi. Afama mīshti atiro. Tsoa a keskarakōima. Nōko xinifāfe āto xanīfo ipaoni David āfe fena Jesús. David xanīfo finakōia ipaofinikē, Jesús finōkōia. Keyokōi ato finōa. Satanás finōta, a xanīfo fetsafori ato finōkōia Jesús. Iskaratīa nono Epa Nios fe ika. Nāskakē na siete taxtati Jesús noko fēpexotiro nā kirika nō ōinō. Nāskakē anā oiyamafe,” ea faa.

<sup>6</sup> Nāskakē nānoa ovejanā fake ě ōia āfe māxo sieteya, āfe ferori nāskara ika. Reteafo keskarafīax Niospa tsaoti ano nia ika. Nānoa nā Niospa onifani cuatrofo feta a veinticuatro Nios Ifofaafo xanīfofōfāfe foaketefayakenafo ika. Tsoa fetsakai a keskarama. Nāato afama mīshti fatiro. Nā fero sietefāfe noko shināmani Niospa āfe Yōshi Shara nīchiano keyokōi nā maitio ano inō. <sup>7</sup> Akka Epa Niospa nā kirika āfe mifi kayakai aōri tsomakē Jesús fīa. <sup>8</sup> Fīxō tsomano nā cuatro Niospa onifanifo fe nā veinticuatro xanīfofo Jesús Ifofamisfo

a nãmã feopakefofãnafo. Nãfãfe maneti yafi kechofo tsofãfo. Nã kechofo oro fakka fakka ikai keskara mēranoax otano ãfe kõi nofe nakas shara nai mēra foai keskara. Nãskarifiai nã Nios Ifofam-isfãfe kīfiaifono Epa Niospa nikamis. <sup>9-10</sup> Akka nã fanãikaifo tsõa nikayomisma fanãikani, iskakani:

Mĩ afaa chakafayamafiamiskē mia retenifo. Mĩ noko nãxoni, mĩ imi foni Satanás anã nõko ifo inõma Epa Nios ãfe fakefo nõ inõ. Nãskakē mĩ fistichi fitiro kirika kenea fēpexiki noko tãpimaxiki. Mĩõnoax nã mia chanĩmara faafo tii maifo tii anoafõ Niospa yora itirofo meka fetsa fetsatapafãfe mekakani. Nãskakē nãfãferi fetsafo mĩ meka shara ato tãpimanano, mĩ ato amapaiyai keskara anõfo. Askatari nã maifo tii anoafõ xanĩfo mefe ixikani, ikax fanãikafo.

<sup>11</sup> Askatari ã õia Niospa ãjirifo ichapakõifo tsõa ato tanatiroma ichapakõi fanãikaifãfe ã ato nika. Nios xanĩfo tsaoti ano nã Niospa onifaa cuat-rofo fe nã xanĩfofo veinticuatrofo feta nakifayakenafo.

<sup>12</sup> Fãsikõi fanãikani iskafo:

Niospa Fake Jesús oveja fake keskara yorafo nãxõa ãto chaka soaxoxikĩ. Akka keyokõi nã maitio anoafõ ato ãkitiro, keyokõi nai mēranoafori ato ãkitiro, nõko mai anoafori ãfenã, keyokõi tãpikõiakĩ, afama mĩshti atiro, keyokõichi mĩ sharakõira fapanakafo. Mĩ fisti nõko Ifo itiro. Aicho, mĩ nõko Ifo mĩ isharakatsaxakĩ mĩ nĩpanakara, ikax fanãikafo.

<sup>13</sup> Askata ã nika keyokõi nai mēranoafo tii fanãikaifono, mai anoafori fanãikaifono ã nika. Mai

mēranoafori ẽ nika. Fakafã anoafori fanãikaifono iskakani:

Epa Nios ẽfe tsaoti ano tsoa, ẽfe Fake Jesús oveja fake keskara, nã rafe nõko Ifo isharakõimisfo. Keyokõichi mã sharakõira ato fapanakafo. Mares fisti mã nõko Ifo itiro. Mã afama mĩshti atiro. Nãskara mã ĩpanaka, ikanax fanãikafo.

<sup>14</sup> Askatari nã cuatro Niospa onifafãfe yoirafo iskafakakĩ: “¡Aicho! Askapainõra,” fata, nã veinticuatro xanĩfofo Nios nãmã feopakefofãnafo. Afãferi Epa Nios yafi Jesús yoisharakani.

## 6

### *Nã siete taxtati*

<sup>1</sup> Nãskata ẽ namakẽ õiai keskara ẽ anã õia. Jesús oveja fake keskara nãato noko nãxoni nãato nã kirika ẽfe taxtati fisti fẽpeaito ẽ õia. Fẽpeaino ẽ nika nã cuatro Nios onifaa fetsa fãsikõi mekaito nai tiri ikai keskara: “Niri ofe,” ikaito.

<sup>2</sup> Askaino kamayo oxo chaima nia ẽ õia. Nã kamayo kamaki fẽtsa kati tsomax tsoano xanĩfãfe maiti Niospa maimana. Nãnoax kamayonõ kaa fet-safo ĩkipai xanĩfo ixiki. Tsoa pishtakai nẽtefatiroma.

<sup>3</sup> Askata Jesús anã kirika taxtati fetsa fẽpea. Fẽpeaino nã cuatro Niospa onifani fetsa ẽ nika iskaito: “Niri ofe,” ikaito.

<sup>4</sup> Nãskafaino kamayo fetsari õshi nokotoshia. Nã kamayo kamaki tsoa fetsari ẽ õia. Keno chainipa Niospa inã aya katanõ maifo tii anoafo ato shinãmatanõ anã isharanõfoma noikaspa faatanãkanax retenãnõfo.

<sup>5</sup> Askatafata Jesús anã kirika taxtati fetsa fêpea. Fêpeaino nã cuatro Nios onifaa fetsa ã nika iskafakĩ yoiaito: “Niri ofe,” ikaito. Anori yoiaino kamayo fetsa fisokõi nokotoshiaito ã õia. A kamaki tsaoa aõ kilo tanati tsomax. <sup>6</sup> Nã cuatro Niospa onifani anoax mekaito ã ãfe meka nika iskaito: “Kori texe fayamanõ, feronãfãke pena fisti yonoxõ kori fixõ trigo kilo fisti fikĩ kopifatiro. Askayamakĩ tres kilo xiki fitiro. Kori texefayamaxõ afaa fetsa fitiroma. Nãskakẽ xini yafi nã uva fimi ene chakanafayamafe. Akka mã texefayamax mã fonãiki omiskõixii,” ixõ yoia.

<sup>7</sup> Askata Jesús anã kirika ãfe taxtati fetsa fêpea. Fêpeaino ã nika na cuatro Nios onifani fetsa, “Niri ofe,” ikaito.

<sup>8</sup> Anori askafaino kamayo fetsa pãshikõi nokotoshiaito ã õia. Nã kamayo kamaki fetsa tsaoa ika ãfe ane Ato Namamis. Nãato yorafo namatiro. “Ë yorafo namapaira,” faito, “Ëje. Mĩ ato namatiro,” Niospa faa. Askafaito nã ato namamisto yora fetsafoya ato retenãmai. Akka atiri ato fonĩ namai, atiri pae fetsa fetsatapafãfe ato namaxii, atiri yoinã põfefãfe ato yokakani. Akka yora kayakõi ato namaxiai ã õia tsõa ato tanãtiroma.

<sup>9-10</sup> Nãskata Jesús ãfe kirika taxtamea anã fêpea. Fêpeaino nã Niospa meka ato yoifofãsafafono fetsafãfe ato redefinifono mã otoafo ã õia. Epa Nios kĩfiti mĩsa ano nã Jesúsnoax nanifo ãto fero mëshofo ichanãkanax fãsikõi mekaito ã nika iskai mekaifono: “Nõko Ifo Nios, mĩ keyokõi tãpikõia. Mĩ afama mĩshti fatiro. Mĩ shara famis. Mĩkai afaa chakafayomisma. Mĩ chanĩmakõi. Nã mia chanĩmara faafãfema mai anoafãfe noko retemisfo.

Nāskakē, ¿afetīa mī ato kopimē omiskōimakī?” ixō yoiaifāfe ē nika. <sup>11</sup> Nāskakē nōko Ifāfe yoia is-fakī: “Manayokāfe. Fena fena kakīma. Fetsafori mato keskarafori eōxō yonomisfo ixikani. Nāfori eōxō nā yora chakafāfe ato retexikani. Akka mā ato retekī mitoafono mā nakanax mato ano nokoxikani keyokōi. Nāskakē nā ato retemisfo ē ato kopixii ato omiskōimakī omiskōipakenakafo mēra ē ato potaxii afaramāi chakafamisfokē,” ixō nōko Ifo ato yoia. Ato yoita rapati oxosharakōi chainipa ato inā, nāfāfemāi taeyoi nikanifono nā Epa Nios Ifofasharamisfo tii ato inā.

<sup>12</sup> Askata Jesús anā kirika āfe taxtati fetsa fēpeaito ē ōia. Fēpeaino fāsikōi mai naya naya ika. Xini anā pee iyamaino, rapati fisokōichi fepoa keskara ika, fakishkōi. Oxeri ōshikōi imi keskara ika. <sup>13</sup> Oa nefe kerexepato nokoki nefekī fana fimi yome mīshti niriatiro keskara. Nāskarifiai fishifo nai mēranoax mai ano pakei fetsea. <sup>14</sup> Askatari nai katarameake kafākē ē anā ōiama. Māchifā fe mai toomāfā mai naya naya ikaino, anā ano ikama. <sup>15</sup> Nāskakē keyokōi mai anoafu ratekōiafo. Yorafāfe āto xanīfofori sorarofāfe āto xanīfofori ratekōiafo; afama mīshtiyafori, yora mitsisipafori, āto yonomatifori, fetsafori ifomaisfori keyokōi nāfo ratekōiafo. A tiiri mafa kini mēra iki-afo. A tiiri māchi keya ano ichoafu tokirinīfā nāmā oneafu. <sup>16-17</sup> Askata fiisikafo iskayanā: “¡Ooa! Epa Nios nai mēra ikato āfe Fake Jesús fe iskaratīa nokoki ōitifishkikōina. ¿Nō afeskatiromē omiskōiyamaxiki? Tsōakai Nios timamatiroma noko omiskōimayamanō. Nā māchi keya anoa tokirinīfā nokoki pakepainō Niospa noko fichinōma nō

omiskõinõma,” ixõ nã nikakaspamisfãfe yoirafo.

## 7

### *Niospa ciento cuarenta y cuatro mil afe yorafa kexexii*

<sup>1</sup> Nãskata ã anã õia oa ãfe namapa õia keskara nã ã mato yoinõ. Niospa ãfe ãjiri cuatro afe nai mẽra imisfo ã õia. Fetsa xini oaikiri nia, fetsa xini kaikiri nia, fetsa xini oaima anori nia, fetsa xini kaima anori nia. Askano nefe nishpapakekafana. Nefe nishpapakekafanaino keyokõi maifo tii anoa nii peifo takka takka ikama. Fakafãri anã poo ikama. <sup>2</sup> Nã cuatro Niospa ato yoiato mai yafi fakafã chakafatirofo. Askata Epa Nios nipanakato ãfe ãjiri fetsa ã õia xini oaikirinoax oaito, nõko Epa Nios ãfe marakka fati feito, a afe yorafa aõ marakka faxii keyokõichi tãpinõfo Niospa afe yorafokẽ. Nã Niospa ãjiri okĩ nã cuatro Niospa ãjiri fetsafori fãsikõi ato yoia iskafakĩ: <sup>3</sup> “Manayokãfe, nã Nios Ifofamisfo ãkisi ãto femãnãki ãfe anefo keneyonõ nãfãfe Nios yonoxomisfoki keyokõichi tãpinõfo. Nãskakẽ fena ato chakana fayamakãfe. Mai anoafõ fakafã anoafori, ififo ato chakana fayamakãfe. Chipõ ato axikakĩ,” ixõ ato yoia.

<sup>4</sup> Akka ã nika mã Niospa ãjirinĩ mã ato marakka faano ciento cuarenta y cuatro mil judeofãfe femãnãki. <sup>5-8</sup> Nõko xini Israel ãfe fakefo feronãfakefos doce inifo. Ato iyoakõichi ãfe ane Judã. Judã ãfe pefeta Rubãn. Rubãn ãfe pefeta Gad. Gad ãfe pefeta Aser. Aser ãfe pefeta Neftalĩ. Neftalĩ ãfe pefeta Manasãs. Manasãs ãfe pefeta Simeõn. Simeõn ãfe pefeta Levĩ. Levĩ ãfe pefeta Isacar. Isacar ãfe pefeta Zabulon. Zabulon ãfe pefeta Josẽ.

José ãfe pefeta ato chipo fakekõi Benjamín. Nã doce feronãfake fisti rasi paxkakanax mã kaiafono nã doce feronãfake anoa Niospa ato katoni. Fetsa anoa doce mil faxõ ifita, fetsa anoari doce mil faxõ ifini. Nãato askafakĩ fetsa doce mil faxõ ato ifiketsani. Nãskakẽ mã afo yosikanax ciento cuarenta y cuatro mil inifo.

*Yorafã rasikõichi rapati oxokõi safeafo*

<sup>9</sup> Askata Epa Nios fe ãfe Fake Jesús nã oveja fake keskara nã tsaoafo ano yorafã rasi niafo tsõa ato tanatiroma. Nã maitio anoafo fisti rasi anoafo, xoko fetsafo, meka fetsayafo ikafo, rapati oxokõi chainipa safeafo ã õia fisti rasichi epe pei tsomafãfe. <sup>10</sup> Nãfãfe fãsikõi yoiafo iskafakakĩ:

Nõko Epa Nios feta ãfe Fake Jesús noko ifimis nõko Ifo Jesús oveja fake keskara nokoõnoax nani nõko chaka noko soaxoxikĩ nõ afe nĩpaxanõ, ixõ yoiafo. <sup>11-12</sup> Nãskata nõko Ifo xanĩfãfe tsaoti ano tsaano ãfe ãjirifãfe foaketi fayakenafo ikafo. Nãskakẽ nã veinticuatro xanĩfofo fe nã Niospa onifanifo cuatrofo nõko Ifo tsaano tsaoafo ikafo. Nãskafono nã ãjirifo nã nõko Ifo tsaano ratokonõ mai chachipakefofãkanax feopakefofãnafo Nios yoisharakakĩ iskafakakĩ:

¡Aicho! Chanĩmakõi, meres fisti mã ishara-pakemis. Meres fisti nokori mã imasharatiro. Mã keyokõi tãpia. ¡Aicho! Nã nõ yopai keskara mã noko axomis. Keyokõichi sharakõi mia fapanakafo. Mã afama mãshti fatiro. Mã nãskapakenaka. Nãskaroko anõkĩ, ixõ yoiafo.

<sup>13</sup> Nãskata nãnoa xanĩfo fẽtsa ea yõka: “¿Na yorafo rapati oxo chainipa safeafo tsoamẽ? ¿Fakiax



feafomē, mī tāpiamē?” ixō ea yōka. <sup>14</sup> “Maa. Ēkai tāpiama. Mī tāpia. Mī ea yoitiro,” ē faito ea yoia iskafakī: “Yorafo omiskōiaifono na yorafori fāsi omiskōinifo. Akka omiskōiaifono Niospa āfe Fāke Jesús ato nāxoni āto chaka ato soaxoxiki. Ato chaka soaxō mā ato imasharakōia. Nāskakē ato rapati oxo shara safemana. <sup>15</sup> Nāskakē Epa Nios ano iskaratīa afe ikafo. Epa Niospa ato yonomana keskara axopakenakafo. Nāskakē ato kexefafāini afara chaka atoki nokoyamanō. <sup>16-17</sup> Niospa āfe Fake Jesús Epa Nios fe imis. Nāto ato kexepakenaka. Nāskakē anā fonāitama, anā nomipakenakafoma. Xinīri anā ato pipanakama. Jesús ato kexeaino inimapakenakafo. Epa Niospa āto ōiti ato fepeaxoxii anā oianōfoma,” ixō ea yoia.

## 8

### *Nā taxtati mā keyoaino Jesús fēpea*

<sup>1</sup> Mā kirika āfe taxtati keyoano Jesús fēpeaito ē ōia namakē ōiai keskara. Nā seis taxtati taefakī fēpeyoa. Akka iskaratīari fetsari fēpea mā keyoaino. Fēpeano Nios ika ano nai mēranoax keyokōi nishparakafo. Media hora nishparakayofo. <sup>2</sup> Nishparakaifono ē ōia Niospa āfe ājirifo siete a ketaxamei niafāfe, nāfāfe Niospa ato yoimis keskara anōfo. Niospa ato tii maneti inā nā ato yoiaitīa āto maneti chāi chāisafanōfo. <sup>3</sup> Askata Niospa ājiri fētsa sapa oro fakka fakka ikai keskara tsomax Epa Nios kīfiti ano nia ē ōia. Akka fētsa sapa kamaki nakas otaxō naneaito ē ōia. Nāskaxō Nios kīfiti mīsa ano oro kamaki sapa faa. <sup>4</sup> Askano āfe kōi nakas shara nai mēra foa āfe mifi kamaki sapa tsomano. Nāskarīfiai Niospa

yorafāfe kīfiaifono Epa Nios ika ari nokoaito nikatiro. <sup>5</sup> Akka ē anā ōia Epa Niospa āfe ājiri yoiaino, mīsa kamakinoa chii fixō āfe sapa kamaki chii fospi faa. Fospi fata nai mēraxō mai ano pota. Askaino mai anoax nai fāsikōi tiiri ika pachakōi ika, kanari piishika mairi naya naya ika. Nāskakē nā chanīmara faafoma tii ato omiskōimaxii.

*Ājirifāfe maneti chāi chāisafafo*

<sup>6</sup> Askata Niospa āfe ājirifāfe siete nā manetifo Niospa ato tii inā itipinīsharafafo chāi chāisafaxikāki.

<sup>7</sup> Askata fētsa āfe maneti chāi chāisafaino faka matsi tokoro efapafo imia osia nai mēranoax keyopakea. Chiiri imiya osia nai mēranoax mai ano pakea. Māifā kaxke fetsa koofi keyoa ififoya. Akka ranāri texea. Akka fasifo kooi keyokōia.

<sup>8</sup> Askata Niospa ājiri fētsa āfe manetiri chāi chāisafaino machi efapa chii xoisai keskara Niospa nai mēraxō nāmā pota. Fakafā mēra pakea. Askaino fakafā kaxke fetsa imi keskara ika. <sup>9</sup> Nāskakē fakafā mēranoax fafīfo ranāri naafo. Askatari kanōanāfāfori ranāri kooafo.

<sup>10</sup> Askata Niospa ājiri fētsa atori āfe maneti chāi chāisafaino fishi efapakōi xofisai chii keskara nai mēranoax pakea fakafo mēra. Akka faka fetsafo mērari pakeama. Askatari faka poyo poyo ikai ano pakea. <sup>11</sup> Nā fishifā āfe ane Mokara famisfo. Nā fishi faka mēra pakeano, faka moka paekōi ika. Nāskakē nā faka ayakanax yorafo ranāri nai fetseafō.

<sup>12</sup> Askatari Niospa ājiri fētsa āfe manetiri chāi chāisafaino xinī anā chaxasharama. Ōxeri anā chaxasharama. Askatari fishifāferi anā ranārīto

chaxasharama. Nāskakē penafekē tsōa anā ōisharatiroma. Fakish finakōia ika. Tsōa askara fakish ōiyomisma.

<sup>13</sup> Ē nāfo ōiaino tetepafā keskara keya yoyaito ē nika. Fāsikōi mekayanā yoia iskafakī: “¡Ooa! Yorafāfe Nios nikakaspakanax omiskōikani finakōixikani. Niospa ājiri tres fetsafāfe āto maneti chāi chāisafaifono mai ano ikafo omiskōifinaxikani,” ixō tetepafā keskarato yoia.

## 9

<sup>1</sup> Askatari Niospa ājiri fētsa āfe maneti chāi chāisafaino nai mēranoax oa fishi keskara nāmā pakeaito ē ōia. Nāskata nā niafaka chakafo kinīfā fakishifā mēra ikafo ano kaa. Nā kinīfā fepotiya. A mēranoaxkai kāitirofoma. Akka nā nai mēranoax nāmā pakea Niospa chavis inā aato kinīfā fakishifā mēranoa ato kāimanō. <sup>2</sup> Fēpeaino mafa kinīfā mēranoax kōinīfā nai mēra foa. Nāskakē xinī chaxasharama. Nai fakishkōi ika. <sup>3</sup> Askata nā kōinīfā mēranoax kōketsere keskara ichapa rasi mai ano fo-toa. Niospa ato pōfekōi ima nifo keskara inōfo. <sup>4-5</sup> Ē nika iskaito: “Mai anoa fasifo fanafo ififo chakana fayamakāfe. Akka nā Niospa yorafo femānāki keneafō, ato tekayamakāfe. Akka nā keneamafo mā ato tekatiro. Akka ato reteyamakāfe. Ato retetamaroko cinco oxe ato amakāfe ato omiskōimakī,” ixō ato yoia. Nāskakē kōketserefāfe ato tekafo nā chanīmara faafoma nifo keskara paekōi meafō omiskōiafo. <sup>6</sup> Nāskakē kōketserefāfe cinco oxe ato omiskōimana nā chanīmara faafomafo napaixikani, tenetirofoma mekani. Askafikanax nakanima.

<sup>7</sup> Iskaratīa na kōketserefo afe keskaramākī ē mato yoinō mā tāpinō. Kamayofō itipinī faax a kamaki tsoaox katiro fetsafo reteikai. Nāskarīfiai na kōketserefo nā kamayo keskarāfo. Kamayo kamaki tsoaoxō fetsafo reteikai keskara īta, xanīfāfe āfe oro maiti maia keskara īta, āto fēso feronāfāke fēso keskara īta, <sup>8</sup> āto foo kērofāfe foo keskara īta, āto piti poomānā piti keskara īta, <sup>9</sup> āto xochi ano rapati kerexkōi keskara safemanano ato tsakapaīyaifono a mēra ikitiroma īta, āto petafo pei pei ikī kamayonō karo keskara niniaino pachakōi īta, fetsafo retenāifo keskara īta, <sup>10</sup> keyokōi tsitsisyāfo. Āto tsitsisi yora chachitiro nifo pae keskara. Āto tsitsisi yorafo omiskōimatiro. Mā oxe cinco finōano anā ato omiskōimatirofoma. <sup>11</sup> Nā kinīfā fakishifā mēra niafaka chakafo ikafo anoā āto xanīfāfe ane israelifāfe mekapā Abadón famisfo. Griego mekapari Apolión famisfo. Nōko mekapari, “Yorafo Retemis,” nō famis.

<sup>12</sup> Akka taeyoi a omiskōiaifo mā finōfiano, akka nāno raferi a finakōia finōama.

<sup>13</sup> Askata Niospa ājiri fētsa āfe maneti chāi chāisafaino, Epa Nios kīfiti oro mīsa shara ano fakka māxo cuatro nia ika. Nā mīsa nakirafenoax mekaito ē nika iskafakī āfe ājirinī yoiaino āfe maneti tsoaoxō nika. <sup>14</sup> “Nā cuatro niafaka chakafo menexemexō nā faka efapa Eufates anoxō manaifo ato mēpetāfe fotanōfo,” ixō āfe ājirinī yoia.

<sup>15</sup> Nā tsekeāfo penata Niospa ato yoiaino ichapakōi ato retenōfo. Nāskakē nā niafaka chaka cuatro Niospa itipinīfani mai kaxke fetsa ano ikafo ato retexinōfo. <sup>16</sup> Ē nika dos cientos millones sorarōfo kamayo kamaki tsoafāfe fetsafo retexikakī.

17 Askata Epa Niospa oa namakē ōia keskara ea ōimana nā sorarofo yafi āto kamayofo ē ōia iskara. Āto xochi ano oa chii ereai keskara kerexkōi āto xochi ano safeafo ikafo. Askatari nanakōiri ika, chaxtari ika a aō xorakomeafo. Akka a kamayofāfe āto mapo poomā mapo keskarafafo. Āto āxfā mēranoax kōi fe chii ereai keskara. 18 Chii fe kōi xofisakī āto āxfā mēranoax kāifaikī ato retepakeafo yorafo ichapakōi ranāri naafo. 19 Āfe āxfā feta āfe tenēri yorafo retetiro. Āfe tene rono pae keskara. Āfe tene mapoya ika. Nāo yorafo omiskōimana nanōfo.

20 Tsoa nayamafiaxō āto chaka xateafoma Epa Nios Ifofaxikakīma. A niafaka chakafo ifofamisfo xateafoma. Nāskakē oro nimofa fakāta, a kerexkōi fakkai fakkaisai nimofa fakāta, keno āfe ane bronze nimofa fakāta, ifi nimofa fakāta, tokiri nimofa fakāta; nāfo askafaxō, “Nāfo nōko nios. Nō aō noi,” ixō yoimisfo. Afāfe ōiyamafiaifono, askatari mekayamafiaifono, askatari kafāsayamafiaifono, nāskakē afo kīfimisfo. Epa Niospa nā āto kaifo yafi yora fetsafo omiskōimafiaito ōifikanax āto chaka xateafoma Epa Nios Ifofapaikania. 21 Ato retekakī xatemisfoma, askatari koshoiki xatemisfoma, askatari āto āfima chotamisfo, kērofāferi āto fenema chotamamisfo, yometsoriai xatemisfoma nāfo xateafoma. Tsōa āto chaka xateama. Nōko Ifo Jesús Ifofaxikakima. Nāfo chakakōifikaxō āto chaka xateafoma nōko Ifo Jesucristo Ifofasharaxikakima.

## 10

*Epa Niospa āfe ājirinī kirika tsoma*

<sup>1</sup> Askata ã õia Niospa ãfe ãjiri fetsa mitsisipakõi nai mēranoax fotoaito, nai kõiya. ãfe maiti nãfa fai keskara maia. ãfe femãnã xinĩ chaxai keskara. ãfe kishi rafe chii keskara. <sup>2</sup> Kirika fepekemea tsomax nia ika. ãfe tae kayakai aõri fakafã femãkĩa paia. Akka ãfe tae oshkiori mai ano paia ika. <sup>3</sup> Askata ãfe meka poomã eapato meka keskara ã nika. Askatari ã nika naitiriki fetseaito. <sup>4</sup> Mẽ nikaxõ nã yoiafo keskara ã kenekerana. Akka nai mēranoax Nios ika anoa meka fetsa ã nika ea yoiaito iskafakĩ: “Nã mĩ nika keskara ãto meka keneyamafe. Mĩ tsoa tãpimatiroma,” ixõ ea yoia.

<sup>5-7</sup> Askata nã Niospa ãfe ãjirinĩ takai fetsa fakafã aõri paita takai fetsari mai ano paixõ anã yoia. Epa Nios nã nipanakato nai onifaa. Askatari nai mēra ikafo onifaa. Askatari mai onifaa. Mai ano ikafori onifaa. Askatari fakafã onifaa. Fakafã mēra ikafori onifaa. Nã Nioskõichi ãfe ãjiri yoia iskafakĩ: “Epa Niospa ea õiaino chanĩmakõi ã mato yoi. Epa Niospa anã manaima. ãfe ãjiri fẽtsa ãfe maneti manekĩ chãi chãisafaino Epa Niospa axiai keskara ãfe meka yoimisfãfe yoiaifo keskara yorafãfe tãpinifoma. Iskaratĩa a Nios yoimisfãfe yoinifo keskara mã askakõia,” ixõ Niospa ãjirinĩ ea yoia.

<sup>8</sup> Askata anã nai mēranoax mekaito ã nika ea yoia iskafakĩ: “Oa Niospa ãjiri fakafãki paita mai ano paiax nia ano katãfe. Nã kirika kataramea fẽpexõ tsoma fĩatãfe,” ea faa.

<sup>9</sup> Askata ã Niospa ãjiri ano kaxõ ã yoia iskafakĩ: “Nã kirika pishta ea inãfe,” ã faito, “Nakĩa, fife. Õixõ tãpikõife. Mã tãpikõixõ mĩ tãpitiro nã meka chanĩmakõi. Niospa meka shara. Askatari

mĩ tãpitiro na meka yoiaifo keskara yorafo omiskõikani. Mĩri tãpixõ mĩ fãsi shinãtiro,” ea faa.

<sup>10</sup> Nãskaxõ ã kirika pishta fita ã õia. Ea yoia keskara chanĩmakõi mẽ tãpikõia. Nã Niospa meka sharafinakõia. Nãskakẽ nã inõpokoai yoia keskara yorafo omiskõixikani. Nã õiax ã shinãmitsakõia. <sup>11</sup> Ë askano, anã ea yoia: “Niospa afe yorafo yoipaiyai keskara anã ato yoife. Afarafo ixiai yorafoõnoa yoife, manifetsafoõnoari yoife, xanĩfofoõnoari ato yoife,” ea faa.

## 11

*Nõko Ifo Jesús yorafo yoipaiyai anori feronãfake rafeta ato yoixikani*

<sup>1</sup> Askata na tanati metro keskara ea inãyanã ea yoia iskafakĩ: “Não Nios kĩfiti pexefã anoã ãfe chainipa yafi ãfe xãki tanatãfe. Anoxõ Nios kĩfiti mĩsari tanafe. Askatari a mẽranoax fanã ikanaifo ato tanasharafe afe tiito Epa Nios fanã ixokanimãkai, askatari afe tiixori kĩfikanimãkai ato tanasharafe. <sup>2</sup> Akka a ketokonõ mapoafõ a israelifoma ato tanayamafe; afãfe na Jerusalén anoafõ ato chakafakani oa fãkka nõ afara faanano fãkka peamanaino kãitiroa keskafakani ato. Cuarenta y dos oxe amaxõ ato askafaxikani. <sup>3</sup> Nãskakẽ nã feronãfake rafe ã ato nĩchixii. Nã rafeta nã ã ato yoipaiyai anori ato yoixikani. Un mil dos cientos sesenta pena ato yoixikani ãfe meka. A rafeta ãto rapati chapokõi safexõ ato õimaxikani. A ato chakafamisfãfe, ato õikakĩ a afara chakafamisfo shinãxikani,” ixõ ea yoia.

<sup>4</sup> Nāskakē Niospa afe yorafo yoipaiyai keskara nā rafeta yoimisfo. A rafe oa ifi olivo keskara. Āfe xini fospia keskariai, a feronāfake rafe Niospa Yōshi Shara ato mēra nanekōiafo. Askatari afia rafe oa rāpari ōtai keskara. Mā fakishkē rāpari otakē nō ōisharakōitiro. Nāskarifikā nā rafeta Niospa Yōshi Sharaōxō ato tāpimaxikani Niospa meka. Mā isharakōikaxō āto Ifāfe meka ato fe yorafo yoixikani. <sup>5</sup> Na Niospa meka yoimis rafe fetsafāfe ato chakafapaiyaifono, āto axfa mēranoax chii kāitiro ato koofaxii nanōfo. Nāskakē nā rafe tsōa ato chakafatiroma. <sup>6</sup> Epa Niospa ato yoiaino, nā rafeta āto mekapa oi nesefatirofo anā fena oi iyamanō nā ato yoiaifotiā. Askatari faka yafi ĩa āto mekapa fetsafatirofo oa imi keskara inō. Askatari afara afeskarafapaikakī āto mekapas afara meseni fet-seaifo fatirofo pae fetsa fetsatapafori fatirofo.

<sup>7</sup> A feronāfake rafeta mā ato yoikī senēfaafono, a chakakōi mai kinīfā mēranoax Satanās shināmanaino, tsekeinākafā a feronāfake rafe retexii. <sup>8</sup> Mā reteafono, fāi nēxpakīa pakeax rakaxikani nā Jesús mastanifo ano, a Jerusalén ano. Nā Jerusalén anoafāfe nōko Ifo Jesús āfe meka shināmisfoma. Nāskakē nō aōnoa yoitiro iskafakī: “Na Sodoma ano ikafo feta Egipto ano ikafāferi, afaa shināpaonifoma. Nāskakē chakakōi ipaonifo anofo. Nāskarākōi Jerusalén anofo.” Nāskax nā feronāfake rafe Jerusalén anoax nakanax āto yora fai nēxpakīa rakaxii. <sup>9</sup> Nāskakē yora fetsafo a mai fetsa ari ikafāfe, xoko fetsafāferi, meka fetsayafāferi, a feronāfake rafe rakafāfe ato ōixikani. Nāskafono āto xanīfofofāfe, “Ato fena maifayamakāfe,” ixō ato yoixikani ato



noikaspakōikakī. Nāskakē tres nia ato ōixikani.  
<sup>10</sup> Askaito ōikani a mai ano ikafo atoki inimaxikani.  
 Askakanax atoki inimakakī fista axikani. Aa ranā  
 kaxpa afarafo inānōnāxikani. Yoikani iskaxikani:  
 “Anā na rafeta noko fekaxtefakanima kiki,”  
 ikanax inimasharakōikani. “Anā nōko chaka noko  
 yoikanima,” ikanax yoināxikani.

<sup>11</sup> Askafiaifono mā tres nia oxata nayoafono  
 anā chipo Niospa ato otofaxii a feronāfake rafe.  
 Askaito ōikani a ato mǎnāo nikaxō ato ōiaifo, afo  
 mesexikani, ratekōixikani, askaifāfe ato ōikani.

<sup>12</sup> Askata nā feronāfake rafe otokāta nai mēranoax  
 mekaito nikakani ato iskafaito: “Niri ekeki  
 māpeferakāfe,” ato faito nikakani a rafe āto ferotaifi  
 ronoinīfofākani nai kōi mēra māpefainifokani.  
 Askaifāfe a ato noikaspaifāfe ato ōikani. <sup>13</sup> Askata  
 samama atoya mai naya naya iki finakōia. Pexefā  
 rasi fisti rasi potaito ē ōia. Askaino siete mil yorafo  
 naafo. A naamafāferi ratekakī Nios yoaifo, “Nios  
 mīfi afama mīshti fatirokī,” faafo.

<sup>14</sup> Mā afo askayoa anā chipo finakōixii.

*Niospa ājiri fētsa āfe maneti chāi chāisa faa*

<sup>15</sup> Akka Niospa ājirinī chipokōitakī nā sietepa  
 āfe maneti chāi chāisafaino, nai mēra Epa Nios ika  
 ariax fāsikōi mekaifāfe ē nika iskai mekaifāfe:

Iskaratīa na nōko Ifo Cristo xanīfokōi iki  
 nāmānoax nai mēra ika keskarari ixii nāatixō  
 xanīfo īpanaka,

ixō yoaifo. <sup>16-17</sup> Akka nā Jesús chanīmara faafo ato  
 kexemisfo nā veinticuatro feronāfakefo tsaokanax  
 a Nios nāmā feopakefofā nafo Nioski inimayanā  
 iskafafo:

¡Aicho, mī fāsi sharakōiki! Mī afama  
 mīshti famiski. Mī Yōshi Sharapa ato īkinā.

Afama mīshti onifaaxma mĩ iyopaonixakĩ. Iskaratĩari mĩ nia. <sup>18</sup> A mai fetsa anoafāfe mia noikaspamisfo mikiki ōitifishkikōikakĩ mefe ikaspakakĩ. Afama mīshti chakafamisfo. Askaifāfe ōikĩ, mĩri ato kopikĩ ato omiskōimaxii atoki ōitifishkikōixō. Akka a mia Ifofamisfo mĩ ato ināsharakōixii afara sharakōifo. Akka a mia yonoxoyanā mĩ meka mēxotaima yoimisfo afo mĩ ato ināsharakōiketsaxii, a mia chanĩmara famisfo tii; keyokōi afaamaisfo ita, a xanĩfori a afama mīshti ichapayafori mĩ ato ināsharakōixii a mia Ifofamisfo tii. Akka nā yorafo chakafamisfo, mĩ ato omiskōimaxii, a amēranoax, omiskōimisfo mēra mĩ ato potaxii, ixō yoiāfo.

<sup>19</sup> Askata a Nios kīfiti pexefā nai mēranoax fepekemeaito ē ōia. Nānoa Niospa kafo ē ōia, nā kafo mēra a Niospa israelifo yoini kirika kenea nanea ika. Askatari ē ōia kana pee ikaito nairi tiri ikaito ē nika, mĩamāfanēri mai naya naya akaito ē ōia, nai mēranoaxri oi kaya ikaino, oi nami keyopakeaito ē ōia.

## 12

*Kēro yafi kapetafā keskara nai mēranoa Juan ōini*

<sup>1</sup> Askata ē afianā ēfe namapa ōia keskara ē mato yoinō a ea Niospa ispaito ē ōiafo nā inōpokoāifo ōikĩ ē tāpinō a tsōa ōimismafo. Ē kēro ōia āfe rapati oa xini pee ikai keskara safea ika nai mēranoax. Oxe kamaki paiya keskara. Askatari āfe maiti ano fishi doce aō neafo. <sup>2</sup> Askata nā kēro mā chaima fake kākĩ, fāke pāefai. <sup>3</sup> Askainori fetsari ē ōia a tsōa ōiyomisma keskara nai mēranoax. Nā

Satanás oa ronofã keskara efapanãfakõi õshimãfa, askai mapo ichapayakõi siete mapoya, askai a ãto xanĩfokõichi maiti sharakõi keskara maiya si-ete faxõ, askatari ãfe mãxofori diez ika. <sup>4</sup> Askata ãfe tene fininĩfofã nai mēshanānaino nai mēranoax fishi rasi pakea. (Naskarifakĩ Epa Niospa ājirifo Satanás atiri ato chakana fama ato ĩkipaikĩ, “Ea ifofakãfe,” ixõ ato feparapaikĩ. Nãskakẽ a keskara niafaka chakafo ato ĩkinõ Niospa nãmã potani nãmãxõ ato ĩkinõ.) Nãskakẽ mã kēro chaima fake kãiyaino, a ronofãnẽ kexei ãfe fake pĩapaikĩ kãiyaito. <sup>5</sup> Askata a kēro fake kãi feronãfake mitsisipakõi. Nãskakẽ yorafo manifo tii, ato kexesharakõixii ãto xanĩfo finakõia ixii. Mēstekõi ato yoisharakõixii nikasharakõinõfo. Askafiaito a fake yome rama afa kãiyaito ronõfãnẽ pipaiyaino Niospa ifirisafaa nai mēranoax afe xanĩfokõi inõ. <sup>6</sup> Askaito õifaini afa ichoachãi tsõa istoma ano a Niospa afetĩama itipinĩ faxoni ano Satanás afeskafanõma arixõ Niospa kexenõ cuarenta y dos oxe akaino Niospa kexesharanõ.

<sup>7</sup> Askatari ě anã õia Satanás ãfe inafõ fe nã ājiri Miguel ãfe inafõ nai mēranoax retenāpaiyaifono Satanás ato finõpaiyaino. Nãskaxõ Satanás Niosri finõpaini. <sup>8-9</sup> Akka Satanás ato finõpaifikĩ ato finõnima. Nãskakẽ fanĩ itirokēma Niospa nãmã potani ãfe inafõya. Taeyoi ājiri iyopaoni. Nãskaxõ nãato keyokõi yorafo maifo tii anoafõ ato pāramis anorima ato yoikĩ chaka shinānõfo, chaka nĩpaxakakĩ.

<sup>10</sup> Askaito ě anã nika meka efapato mekai iskaito: “¡Aicho! Epa Niospa mã Satanás nirixõ nãmã potaki, mēxotaima āakõi noko

fanīrira pārarifaito. Nāskakē Epa Niospa Satanás finōinīfofana. Nāskakē Satanás anā nōko ifo ikima, anā fanīrira noko shināmanima, Epa Nios fisti nōko Ifokōi iki. Askatari āfe Fake Jesucristori nōko Ifokōiri iki. Nā rafe nōko Ifokōi. <sup>11</sup> Nāskakē Jesús Ifofaxō mēxotaima nō yoimis niri nai mēra oyoxoma nō yoiyopaoni nāmāxō iskafakī: ‘Nōko Ifo Jesús, Niospa Fakekōi, oa oveja fake keskaraxō noko nāxoni nōko chaka noko soaxoxiki,’ ixō nō yoimis mēxotaima. Askatari nō Niospa meka ato yoimis. Nāskai nō meseima, ‘Noko retefiaifono, nō inimasharai,’ ixō anori mēxotaima nō yoimis. Askaxō nō Satanás finōinīfofana. <sup>12</sup> Nāskakē māri nono nai mēranoax inimakāfe Niosnoax. Nā chanīmara faafāfe Jesúsxō mā Satanás finōkōiafo. Akka Satanás Niospa nāmā potani nai mēraxō. Askafaino ōitifishkiki nāmā fotoxō yorafo chakafapaikōi. ¡Ooa! Yorafo ono mai anoax fe fakafā mēranoaxri omiskōikani. Satanás mā tāpia afetiara Jesús mai ano fotoai tsōa anā afaa chakafanōma. Nāskara mā tāpiax Satanás ōitifishkikōikī keyokōi maifo anoafō ato chakafamapai omiskōinōfo Jesús fe ĩpaxanōfoma,” ixō nai mēranoax mekaito ē nika.

<sup>13</sup> Mā afo nikakī ē anā ōia afia ē ōiyoa keskara. Mā Niospa Satanás nāmā potano, Satanás shinākī iskafai: “Na kēro ē akiki nokoxō omiskōimanikai,” ixō shināki Satanás chīfafaina. <sup>14</sup> Nāskakē Niospa nā kēro tetepafā pei keskara inā aō katanō tsōa istoma ano. Nā afetiama Epa Niospa itipinī faxoni ano mā kaxō anoxō piinō cuarenta y dos oxe akī, nā niafaka chakata ronōfā keskarato afeskafanōma. <sup>15</sup> A kēro ari ikano chakafapaikai Satanás ari kai. Mā kaxō chaima nikaxō āfe axfapa faka

siiakī faka faipafānē iyotanō āsapaikī. <sup>16</sup> Askafaito ōikī Niospa mai kaxkexoni a mēra faka faipafā ikikaitanō a kēro afeskafanōma. <sup>17</sup> Nāskaito ōi Satanás a kēroki ōitifishkikōina. Nāskax nā kēromā āfe fakefoki kaa ato retepai, nāfāfemāi Niospa meka nikakōisharaifono isharakōiyanā Jesús Ifofasharakōiyanā. <sup>18</sup> Askata ē anā ōia Satanás fakafā kesemē nia.

## 13

*Fakafā mēranoax yoinā keskara mesekōi kãinākafana*

<sup>1</sup> Askata ēfe namapa ē ōia keskara afianā ē mato yoi. Ē ōiaino fakafā mēranoax yoinā keskara mesekōi kãinākafanaito ē ōia. Nā yoinā pōfe keskaraōnoa ē mato yoinō. Ea nikasharakāfe. Nā fistiflax mapo ichapaya, siete mapoya. Askatari āfe māxo rasi diezya. A āfe māxo rasi xanīfāfe maiti maimakī fetsa. Nāskaxō Epa Nios mekafakī chakakōi faa. Āfe femānāfoki ane fetsafo chakakōifo nēta. <sup>2</sup> Askai oa poomā keskara āfe yora. Askatari āfe tae oa osopa tae keskara. Askatari oa poomā axfa keskara. Nāskara Niospa ea ōimana ē tāpinō a feronāfāke Satanāōxō tāpikifinakōia, oa xanīfo finakōia keskara ixii nāmānoax. Satanás āfe yōshi ināno ato yoimis ixii, afama mīshti fakī fetsaki ato ōimaxii. <sup>3</sup> Āfe mapo fetsa ano mā māpeafiafono anā otoax afianā nia. Nā mai tio anoxō yora rasichi ōikani askaito: “Kee, ʔafeskax otoamē mā nākōina nō ōia?” ixō yoikani. Nāskaito ōikī ifofaxikani. <sup>4</sup> Nāskakē ifofakaxō yoikani Satanás iskafakī: “Mī fāsi sharakōi. Mī afama mīshti famis,” fakaxō ifofakani. “Nāskaxō

nā yora pōfekōi inō mī yōshi mī inā nōko xanīfokōi inō. Nāskaxō nō mia chai faima,” fakaxō yoikani. Askatari oa yoinā keskara akiki inimakakī fanāixokani iskafakakī: “Mia keskarakai tsoama. Mī fāsi sharakōi. Miakai tsōa chakafatiroma. Mī fistichi ato finōkōia,” fakaxō yoikani fanāikakī.

<sup>5</sup> Askatari anā Nios chakakōifakī yoia iskafakī: “Fato fetsakai ea keskarama. Ē Nios finōkōia,” ikax, āa chanī Nios chakafakī finakōimis. Nāskafekē Niospa yoixii: “Cuarenta y dos oxe finōta mī anā afaa fatiroma xanīfokōixō afara fetsafo sharafakī.” <sup>6</sup> Nios noikaspakī mekafakī fetsaito ē nika iskafaito: “Fato Nioskai nai mēra ikama. Anā ano Niosma. Mā kaxpakōi mā Nios Ifofai,” ixō yoia. “A yora namisfāfekai fato Nios Ifofamisma,” ato fakī fetsai. <sup>7</sup> Askatari Satanás ifofakaxō ato afara shināmānaino yorafāfe a Jesús Ifofamisfo ato finōpaikī ato retepaikani āto xanīfo ipaikakī. Askatari maitio anoafō, xoko fetsafo, mēka fetsafoya keyokōi āto xanīfo ikani a feronāfake xanīfo chakakōi a Satanás yōshi a mēra nanea. <sup>8</sup> Askafaxō yoisharaxikani akiki inimakakī: “Mī fāsi finakōia, mī nōko nioskōi,” ixō yoixikani akiki inimakakī. Askaifāfe tāpixō nōko Ifo Niospa atoki kirika keneama a Ifofaafāfema ōikī. Mai onifataima mā tāpixō Niospa āto anefo āfe kirikaki kenei fatofāfe Jesús Ifofaimākai. Akka nā Jesús ovejanā fake keskara noko nāxoni noko īkipakexakī.

<sup>9</sup> Mā pachoyakī ea nikasharakāfe. <sup>10</sup> “Nā Satanás ifofaafāfe mato karaxa mēra ikimakaki mato ikimaxikani. Askatari mato kenopa retekakī mato retexikani.” Nāskakē efe yora mīshtichi, shināchakayamakāfe. Nā nō Jesús chanīmara faafo tii nō omiskōifikī, nō tenekōixii nōko Ifo Jesús

shinãmakitama.

<sup>11</sup> Askatari ã anã õia oa namakẽ õia keskara. Mai mẽranoax kãinãkafanaito ã õia yoinã põfe fetsa keskara. Æfe mãxo tiixo pishta rafe oveja fakenã keskara. Askai fãsikõi mekai oa poomã keskara ãfe meka mẽxakõi chai potai. Askaito ã õia. <sup>12</sup> Akka nã yoinã põfe taeyoi fakafã mẽranoax kãiyaito afama mĩshti atiroxakĩ nãato yoiaino nã rama oatori afama mĩshti atiro nã fẽtsa aka keşkafakĩri nãskaxõ yorafo tii ãkitiro. Keyokõi maifo tii anoafõ ato yoia iskafakĩ: “A yoinã keskara mã mapoki rerafo mã nayofiax afianã mã otoa nã fisti ifofakãfe. ‘Na nõko ifora,’ fakãfe,” ixõ ato yoia. <sup>13</sup> Afama mĩshti tsõa atiroma keskara ato ispa yorafãfe chanĩmara fanõfo. Nãskata yorafãfe ãto ferotaifi nai mẽranoa chii fotomana. <sup>14</sup> Satanáõxõ nãskarifikĩ yorafo pãra niosra fanõfo. Askafata ato yoia: “Nã yoinã põfe keskara retefiafono mã otoa nã nimofonõfã faxõ inãkãfe a keskara faxõ,” ixõ ato yoia. <sup>15</sup> Nãnori ato yoiaino mã nimofonõfã mãpeakano xãkaitiroma. Askafiano Satanáõxõ xãkaima mekanõ, askatari a siete mapoya mekayamaifo ato retenõ. <sup>16</sup> Askata anã ato yoia iskafakĩ: “Maitio ikafãfe ãto mẽke kayakai aõri kenenõfo askayamakĩ ãto femãnãki kenenõfo.” Nã yoinã põfe keskara fakafã mẽranoax kãiato ãfe ane keneyamakĩ ãfe número ato kenemana. Keyokõi ato kenemana. Fakefo kenemata, xinifori kenemata, afama mĩshtifoyari kenemata, afaamaisfori kenemata, inafomari kenemata, inafori kenemana. Tsoa pishta finõmanama. Keyokõi nã yoinã põfe keskarato ãfe ane atoki kenemana. <sup>17</sup> Tsõa nã ane keneyamaxõ afaa fitiroma. Askatari afaa inãmitsatiroma a piaifori tsõa

fitiroma, a rapati yopaifori tsōa fitirofoma.

<sup>18</sup> Nāskakē Niosxō shināsharatirofo nā yoinā pōfe keskara āfe número tāpitirofo. Āfe número tāpixō āfe aneri tāpitirofo. Nā yoinā pōfe keskarafix feronāfakekōi, āfe número seisientos sesenta y seis.

## 14

*Jesús chanīmara faafo ciento cuarenta y cuatro mil akiki fanāikani*

<sup>1</sup> Askata ēfe namapa ē ōia keskara afianā ē mato yoinō. Nā Jesús ovejanā fake keskara māchifā āfe ane Sión ano nia ē ōia. Askatari ciento cuarenta y cuatro mil afe yorafo afe niafo ika. Āfe ane Jesús yafi Epa Nios āto ane femānāki kenea ē ōia. <sup>2</sup> Nāskatari nai mēranoa meka efapakōi ē nika. Faka pōoitifā keskara ē nika, nai tiri ikai keskarari pachakōi ē nika. Meka efapari ē nika yora ichapa fanāikanaifono āto manetiya ichapa rasi fanāikanaifāfe ē nika. Nā manetinī āfe ane arpa. <sup>3</sup> Fana fena tsōa nikayomisma Epa Nios ferotaifi fanāixōafo. Nānoxori nā cuatro Niospa onifanifāfe nikakani. Askatari nā veinticuatrofāfe nikakani. Nā ciento cuarenta y cuatro mil nono mai anoa Jesús ato ifini, nāfāfe na fana fena tāpitirofo. Tsoa fētsakai tāpitirofoma. <sup>4</sup> Nā ciento cuarenta y cuatro mil yorafāfe nōko Ifo Jesús Ifokōi famisfo. Afara chaka shinātamaroko Jesúsnoa shināfāfāikani. Aato ato ifimis ato nāxonixakī Epa Nios yafi āfe Fake Jesús Ifokōi fakanax āfe yora inōfo. Ato iyopaiyai ari afe fomisfo. Ato katoa afe yorakaxō ato yoiai keskara anōfo. <sup>5</sup> “Nāfāfe chanīkī yoimistra,” ixōkai



tsõa atoõnoa yoitiroma. Jesúсноax isharamisfo. Aõxõ afaa chakafamisfoma.

*Niospa ãfe ãjiri trespa yoiãfo*

<sup>6</sup> Askata ã õia Niospa ãjiri fẽtsa nai mẽra ika fãsi keyakõi yoyakĩ keyokõi yorafo maifo tii anoãfo ato meka shara yoiã. Yorafo keyokõi yoita, xoko fetsafo tii yoita, nã meka fetsa fetsatapafãfe meka yoimisfori yoita, nã mani fetsafo tiiri ato meka shara yoiã. Epa Nios nipanakaõnoa ato yoiã. <sup>7</sup> Mekakĩ fãsikõi ato yoiã iskafakĩ: “Nios shinãkãfe. Nikakõikãfe. A noikõikãfe. ‘Mĩ sharakõi, mĩ afama mĩshti mĩ atirora,’ fakãfe. Iskaratĩã Niospa nã keyokõi chakafamisfo ato omiskõimani. Nãato nai onifani, mairi onifani, fakafãri onifani, faka sharari onifani. Nãskakẽ a noikãfe: ‘Mĩ nõko Ifo Nios sharakõi,’ fakãfe,” ato faa.

<sup>8</sup> Askata Niospa ãjiri fẽtsa mã mekai keyoano fetsari nokotoshixõ iskafakĩ yoiã: “Babilonia ano pexe rasi iyopaoni. Iskaratĩã anã ano tsoa ikama. Nãnoxõ yorafãfe afara chaka shinãpaonifo. Fet-safori afara chaka ato famapaonifo ato keskara inõfo. Askaifãfe Epa Niospa ato omiskõimani anã ano inõfoma. Nãskakẽ Babilonia anã anoma,” ixõ Niospa ãjirinĩ nai mẽra ikato yoiã.

<sup>9-11</sup> Askata afianã Niospa ãjiri fetsari nai mẽranoax nokotoshixõ meka fãsikõi yoiã iskafakĩ: “Fẽtsa nã yoinã põfe keskara yafi ãfe nimofõ keskara nikakõikĩ yoimis iskafakĩ: ‘Nã ãfe nioskõi,’ ixõ anori yoikĩ ãto mẽkeki kenenifo, askayamakĩ ãto femãnãki na yoinã põfe keskarato ãfe ane keneafãfe Epa Nios atoki õitifishkikõixii. Nãfo Niospa ato fãsi kerexkai omiskõimaxii. Chii mẽra ato potafianokai keyonakafoma. Jesús ãfe ãjirifo

sharakōifo feta ōiaino a omiskōipakenakafo mēra Niospa ato potaxii chakamāi famisfono, Nios nikakaspakakī. Pae meekakī xatenakafoma. Tsōa ato ifitiroma, nā yoinā pōfe keskarato āfe ane āto mēkeki keneafono, askayamakī ato femānāki keneafono. Nāskakē pena tii ita, fakishchāi ita, omiskōixikani tenepakenakafoma,” ixō Epa Niospa āfe ājirinī yoia.

<sup>12</sup> Nāskakē efe yora mīshtichi, māto ōiti inima-masharakāfe. Omiskōifikī tenekāfe. Niospa noko yoini keskara akāfe. Nōko Ifo Jesús kachikiri fayamakāfe.

<sup>13</sup> Askata ē meka nika nai mēraxō ea yoiaito: “Ē mia yoiai keskara kenefe. Fatorafono nōko Ifo Jesúsnoax nai, inimakōixikani,” ixō ea yoia. “Chanīmakōi. Mā nakanax anā omiskōitirofoma. Epa Niospa ato ama keskara akōikanax, nāskakē inimakōixikani. Nāfāfe fetsafo shara faxomisfono Nios atoki inimasharaxii. Akka Epaki nokoafono ato ināsharaxii,” ixō Niospa Yōshi Sharapa yoia.

*Nā chakafamisfoki Nios ōitifishkikōikī maifo tii anoafono ato ichanāfai ato omiskōimaxii*

<sup>14</sup> Akka ēfe namapa ōia keskara afianā ē mato yoinō. Ē afara fetsa ōia nai kōi oxokōi kamaki feronāfake tsaokē ē ōia. Ē ōikī iskafaa: Xanīfāfe maiti orokōi maiya, askatari keno extea ikikōi tsoma ika. <sup>15</sup> Akka āfe ājiri fetsa Nios kīfiti pexefā anoax kaxō fāsikōi yoia iskafakī: “Nā maifo tii ano mā fanafo ōshia. Nāskakē iskaratīa mā fanafo chetekani. Akka mī keno exteato taxtexō ichafafe,” faa. Nānori yoifikī fanakōifoōnoa yoia. Niospa yorafoōnoa yoia iskafakī: “Iskaratīa keyokōi Jesús chanīmara faafo

tii ifife Epa Nios fe ika anoax ichanākanax afe ĩpaxanōfo,” ixō yoia.

<sup>16</sup> Askata nā nai kōi kamaki tsaoto āfe kenopa fanafo taxtea keskafakī āfe sharaōxō a chanīmara faafo tii ifia afe ĩpaxanōfo.

<sup>17</sup> Askata ē ōia nai mēranoa ājiri fetsari Nios kīfiti pexefā anoax kaito, aatori keno extea ikiai tsomax. <sup>18</sup> Afianā ājiri fetsari Nios kīfiti mīsa anoax kaa. Nāato Niospa maifo tii anoa koatiro. Nāatori keno extea ikiai tsomax fāsikōi mekeyanā yoia: “Nā uva fimi mā pachiaki. Mextexō ichafafe,” ixō yoia. Nāskarifakī Epa Niospa āfe ājiriōxō a nikakaspamisfo ichanāfaxii.

<sup>19</sup> Nāskata nā Niospa ājirinī āfe keno extea ikiai tsomaxō uva xatexō āfe tsinīti mēra nanea āfe ene fonō. Nāskarifakī Niospa ājirifāfe nā Niospa meka nikakaspamisfo ato ichanāfai. Akka Nios atoki ōitifishkikōixō ato omiskōimani. <sup>20</sup> Nios ika anoxō ato omiskōimanama. Iskafakī ēfe namapa ē ōiai keskara ea ōimana. Fetsafāfe ato retexikani āto imi ichapa foxii. Askara tsōa ōiyomisma. Āto imifo kamayofa tesanākōixii. Āto imi chaikōi trescientos kilometros foxii. Ato imi noakōi un metro ixii, nakirafekōi. Nāskarifakī nā Epa Nios nikakaspamisfo omiskōixikani ato omiskōimanaitīa.

## 15

*Epa Nios āfe ājiri siete afianā ato yoia mai anoafa ato omiskōimanō*

<sup>1</sup> Askata anā ēfe namapa ē ōia keskara ē mato yoinō. Afara fetsa tsōa ōiyomisma nai mēranoa ē ōia. Ē ratekōia. Akka Nios nā yora nikayospafoki ōitifishkiki. Nāskakē āfe ājiri siete ato yoia keyokōi

mai anoafu ato omiskōimanōfo. Mā askafafono Epa Niospari ato omiskōimani. Akka anā tsoaki ōitifishkixō, Niospa ato omiskōimatiroma.

<sup>2</sup> Askata ē ōia fakafā feroikima raka chiiya osia keskara. Nāno yorafā rasi niafo ika. Nā yorafāfekai yoinā pōfe keskara ifofaafoma; āfe nimofori ifofaafoma; āfe numerori āto yoraki ke-neafoma. Nāfāfe ato finōkōiafo. Nā fakafā feroikima raka chiiya osia keskara a kesemē maniafo. Epa Nios ato tii maneti ināpakea. Nā maneti āfe ane arpa. <sup>3</sup> Taeyoi Nios yonoxomiskōi Moisés ipaoni. Nā Moisés āfe rāfiffo finōkōiax fanāini keskara nāskarifiai āto arpa tsoamakaxō Jesús shinākakī fanāikani a Moisés fanāini keskara iskafakakī:

Ifo, mīfi Nioski. Mī afama mīshti atiro. Mī amis keskara sharakōi. Tsoa fētsakai atiroma. Mī mai fetsa anoafori keyokōiōnoax mī āto xanīfokōi ipanaka. Mī shināmis keskara mēstekōi ikōina. <sup>4</sup> Ifo, keyokōi mikiki mesekakī mia nikasharapainōfo. Mī afama mīshti tsōa ōiyomisma mī atiro. Keyokōi maitio anoafāfe anori yoipakexanōfo. Mī fistichikai afaa chakafamisma. Mī shara fisti famis. Afetīara mī ato apaiyaitīa mī ato omiskōimaxii a chakafamisfo. Chanīmakōi mī ato askafaxii. Keyokōichi mā fēkaxō mia shinākani inimayanā fanāikani,  
ixō yoiaifāfe ē nika.

<sup>5</sup> Askata afianā ē ōia nai mēranoa Nios ika anoa. Ea fēpexona Nios ika ano ē ōinō. <sup>6</sup> Nios ika mēranoax āfe ājiri siete ichanāfo. Rapati oxokōi chainipa choshtama fafeai safeafo, oro ōshi keskarato xonexemeafo. Nāfāfe mai anoafu ato

omiskōimakani omiskōinōfo. <sup>7</sup> Nāskakē nā cuatro Niospa onifaa fētsa Niospa āfe ājiri sietefo ato oro kecho ināakea. Nios nā nipanakato nā Ifofaafoma mai anoafoki ōitifishkikōikī nā kechofo mēra afara chakafo fospi faa nāskaxō chipo atoki ājirifāfe nachiakeafono omiskōinōfo. <sup>8</sup> Nios ika mēra kōinīfā nashfiāi keskara. Niospa āfe kerex shara a mēra fospiā. Nāskatari a mēraxō chaxasharai. Akka mai anoxō nā Nios nikakaspamisfo Niospa ājirifāfe ato omiskōimakani omiskōinōfo. Nāskakē a ato omiskōimanai xateamano tsoa Nios ika ano ikitirofoma.

## 16

*Nikayospafo Niospa ato omiskōimani omiskōinōfo*

<sup>1</sup> Askata Nios ika ariax fāsi mekaito ē nika. Niospa ājirifo siete ato yoia iskafakī: “Niospa a nikakaspamisfo mai ano ikafo atoki ōitifishkikī nā kechofo mēra afara chakafo fospi faa atoki nachitakāfe,” ixō ato yoia.

<sup>2</sup> Nikakaxō Niospa ājiri fētsa taefakī āfe kecho mēranoa nai mēraxō mai ano nachia. Nāskatari nā yoinā pōfe keskarato āfe ane āto mēkeki keneyamākī āto femānāki keneafō, āfe nimōfo keskarari ifofaafō nāfo kooyoi fetsekaxō paekōi meexikani.

<sup>3</sup> Askata afianā Niospa ājiri fētsa āfe kecho mēranoa nai mēraxō fakafānaki nachia. Mā nachiano fakafā ōsinātana nā yora reteafono āfe imi foa keskara. Nāskakē keyokōi nā fakafā mēranoax nai fetseafō.

<sup>4</sup> Askata afianā Niospa ājiri fētsa āfe kecho mēranoa nai mēraxō fakafoki nachia, askatari mai

mēranoax faka tsekeaifokiri nachia. Nachiaino fakafo fe mai mēranoax faka tsekeaifo fe imi keskara osiafo. <sup>5-6</sup> Askatari Niospa āfe ājiri fetsa mekaito ē nika. Nā faka kexemisto iskafakī yoia: “Epa Niosi, mī tsoa onifataima mī iyopaoni. Nāskakē nā mī iyopaoni keskarari iskaratīari mī nīpanaka. Mī shara fisti amis. Aicho, iskaratīa nā mia nikakaspamisfo mī ato omiskōimani chanīmakōi. Āto chaka xatekaxō mī Fake Jesús Ifokōi fanōfo, mī meka ato yoimisfori nā Jesús Ifofaafāfema ato reteafo. Nāskakē nā mia Ifofaafoma mī kopikiri ato namai chanīma. Mefe yorafo omiskōimamisfo. Nāskakē ato kopikiri nā mia Ifofaafoma mī ato omiskōimani omiskōinōfo. Chanīmakōi ato omiskōimani,” ixō Niospa ājirinī yoia.

<sup>7</sup> Askatari Nios nai mēra ika anoa nā kīfiti ano fistixō Epa Nios kīfimisfo anoa ē fetsa nika yoikī iskafaito: “Nōko Ifo Nios, mī ājirinī yoia keskara chanīmakōi. A mia nikakaspamisfo mī ato omiskōimatiro. Chanīma, mī mēstekōi ixō mī ato omiskōimani,” ixō yoia.

<sup>8</sup> Askata Niospa ājiri fētsa Nios ika arixō āfe kecho mēranoa afara chaka xiniki nachia. Akiki nachiano xini chii keskara ikano yorafo koofafo. <sup>9</sup> Xini xanakōiaino yorafo koofafo. Kookani omiskōiafo. Mā tāpiyomisfo Niospa ato omiskōimafiaino āto chaka xateafoma. Nios Ifofatamaroko. Iskafakī yoimisfo: “Niospa noko chakafai. Nios chakakōi,” ixō yoiafo. “Nios shara. Afama mīshti fatiro,” ixōkai tsōa anori yoipaikanima.

<sup>10</sup> Askatari Niospa āfe ājiri fētsa Nios ika arixō āfe kecho mēranoa nā yoinā pōfe keskara

chakakōikī afe ikafokiri atoki nachia. Nachiano nā yoinā pōfe keskara ifofaafō ika ano fakishkōi ika. Nāskakē keyokōichi paekōi meafō, aripe iyanā. <sup>11</sup> Nāskai omiskōifikakī āto chaka xateafoma. “Niospa noko iskafai. Nios chakakōi,” ikaxō āto chaka xateafoma.

<sup>12</sup> Askatari anā Niospa ājiri fētsari nai mēraxō āfe kecho mēranoa faka efapa āfe ane Eufrates kamaki nachia. Mā nachiano nā Eufrates netsorisatana. Nāskakē xanīfofo xini oaikirinoax fekani, mā Eufrates netsokōiano, āto sorarofō feta pokeferakani.

<sup>13</sup> Askatari ē niafaka chakakōifo tres feko keskara ē ōia. Fetsa ronōfā keskara nā Satanās āfe āxfa mēranoax kāikaina, fetsari nā yoinā pōfe keskarato āfe āxfa mēranoax kāikaina, fetsari: “Ē Niospa meka ē mato yoimisra,” iki, a chanīmisto āfe āxfa mēranoax kāikaina. <sup>14</sup> Nā tres niafaka chakafāfe tsōa afaa ōiyomisma keskara afama mīshti yorafo ispafo. Keyokōi xanīfofo a ano fokani ato ichanāfanō nōko Ifo Jesús afe yorafo retenōfo. Nāskatari nōko Niospa afama mīshti famisto afe yorafo ispaxii.

<sup>15</sup> Askatari nōko Ifo Jesús ato yoiaito ē nika iskafakī ato yoia: “Ea nikakāfe. Yometso tsōa yoyamano koshikōi peke mēra ikirisatiro afara onexikī. Nāskarifikā ē tsoa tāpimanima nā ē matoki nokoaitīa. Ē matoki samamashta nokorisai. Mā itipinīsharakaxō ea manasharakanax inimasharaxikani. Akka tsoa itipinīsharayamano ē matoki nokoaitīa keyokōi yorafāfe ea ōikani afāfekai ea Ifofasharama. Nāskakē rāfikōitirofo,” ixō yoia.

<sup>16</sup> Nānori nōko Ifo Jesús yoifiano nā tres niafaka chakafāfe keyokōi xanīfofo maifo tii anoafō

ichanãfaa Niospa yorafo retepaikĩ. Ato ichanãfai nã mai ãfe ane israelifãfe meka pa Armagedón famisfo anoxõ.

<sup>17</sup> Askata Niospa ãjiri fẽtsa anã nai mẽraxõ ãfe kecho mẽranoa nachia. Mã nachiano Epa Nios meka fãsikõi is kai: “Mẽ keyokõi aka,” ixõ yoiaito ã nika.

<sup>18</sup> Askatari fãsikõi kana piishikai ita, afarafo pachakõifo ita, nai tiri iki ikai ita, mai naya naya ita, askarafokai tsõa õiyomisma. Nã feronãfake onifakĩ taefanitãa tsõa mai naya naya iki finakõiaito askara tsõa õiyomisma. <sup>19</sup> Akka nã Babilonia anoax mai naya naya ikaino mai tres kaxketani. Maifo tii anoari ãto pe xe rasi nã mai naya naya ikaino maokomea. Nã Babilonia anoafõ anã Niospa shinãni afara chakafamisfono. Nãskakẽ atokĩ õitifishkikõikĩ ato omiskõimani omiskõinõfo. <sup>20</sup> Nãskatari nã mai toomãfã anoafõ yamarisatana. Keyokõi mãchifãfori yamarisatana. <sup>21</sup> Nãskatari oi nami matsi tokorofo efapakõi ãfe efe cincuenta kilo nai mẽranoax yorafoki pakea. Askafiaito õikakĩ ãto chaka xateafoma. “Nios chakakõi. Na oi nami efapakõi nokoki potai,” ixõ yoiaifãfe ã nika.

## 17

### *Mai fetsa anoafõ kẽro feroma keskarafõ*

<sup>1</sup> Askata anã ãfe namapa ã õia. Afara afeskara ixiai keskara anã ea õimana. Nã Niospa ãjiri sietepa kecho tsomafo ikafo akka fistichi ea yoia: “Niri ofe. Na pe xe ichapa rasi fakafãfo chaimashta anoafõ chakakõifo. Kẽro feromakõi keskarafõ Nios nikakaspakani. <sup>2</sup> Akka keyokõi xanõfofo maifo tii anoafõ ato fe chaka imisfo. Nãskakẽ atoõnoax afori



chakakōifo ikafo. Nā kēro feromakōi keskara ikafo chakafakani. Akka nā Niospa ato omiskōimaxiai keskara ẽ mia õimanõ,” ixõ ea yoia.

<sup>3</sup> Ea askafaino ẽ anã namakē õia keskara ẽ õia. Epa Niospa Yōshi Sharaõxõ ajirinĩ ea iyoa tsõa istoma ano ea iyoa. Nãnoa kēro ẽ õia yoinã pōfe õshikōi kamaki tsaokē. Nã yoinã pōfekōi ẽfe yora tiixõ ane ichapato kenea ika. Keyokōi nã anefo kenekĩ Nios mekafakĩ chakafaa. Nã yoinã pōfe ẽfe mapo sieteya. Ẽfe mǎxõ diezya. <sup>4</sup> Nã kēromã sama chainipa yafi nana õshi safea ika. Oro fakka fakka ikai keskara safea. Askatari makex keskara fakka fakka ikai sharashta yafi fetsa ẽfe ane perla oxoshara, nãri safea ika. Nã kēromã kecho oro tsoma a mēra afara chakakōi naneato, a mēra nanea keskara yorafo afara chakakōi fetsa fetsatapafo chakafama. Ẽto mēra nanexõ ato afara chaka shinãmana. Ato pǎemata, chanĩmis ato imata, ẽto ẽfima chotamisfo ato imata, ẽto femema chotamamisfo ato imata, nãskara chakakōifos ato imamis. <sup>5</sup> Ẽfe femǎnãki kenea keskara tsõa tǎpimisma. Iskara kenea: “Babilonia anoafõ tosa keskarafoma. Nã kēro feromakōichi Nios nikakaspai keskarafo. Nãskakē fetsa fetsatapafo chakafakĩ finakōimisfo,” ixõ kenea. <sup>6</sup> Nã kēro feroma keskarato Jesús chanĩmara faifo ichapakōi ato retea inimayanã. Nãskaito õikĩ tǎpia. “Choo, na kēromãtsi ato retemiski,” ixõ ẽ shinã. <sup>7</sup> Ẽ askaito Niospa ajirinĩ ea iskafaa: “¿Afeskai mĩ ratemet-saimimē? Ẽ mia yoinõ, ea nikapo. Na kēro yafi nã yoinã keskaraõnoa ẽ mia yoinõ. Na yoinã pōfe keskara siete mapoya askatari diez mǎxoya tsõakai askara tǎpiyomisma. Akka iskaratĩa ẽ mia

tāpimani. <sup>8</sup> Nā yoinā pōfe mī ōiai yoinākōima. Nāfi xanīfo efapa chakakōi. Nāato Nios nikakas-pamis. Taeyoi niyopaoni. Anā iskaratīa niama. Askafiax chipo nā niafaka chakafo kinīfā mēra ika anoax kaixii. Nānoax kāifekē Epa Niospa a omiskōipakenakafo mēra potaxii anā anoax faki kanakama. Akka nā taefakī mai onifakī taefanitīa yorafāfe āto anefo Niospa āfe kirika keneni, nāfo afe ipanakafo. Akka a āfe kirikaki āto anefo ke-neama, afo Nios fe ipanakafo. Nāfāfe yoixikani iskafakakī: ‘¡Kee, ōikapo! Mā nafianixakī afianā mā otoa,’ ixō yoixikani.

<sup>9</sup> “Akka fētsa Niosxō mēstekōi shinākī nāato nā ě rama kenea keskara tāpitiro. Nā yoinā pōfeōnoa ě mato yoinō, ea nikasharakāfe. Āfe mapo siete mapokōima. Nā siete mapoxō xanīfoōnoa noko tāpimai. Nā ikafo siete māchifā. Nānori nā kēro feroma ika. <sup>10</sup> Cinco xanīfofo anā anoma. Mā nanīfo. Fisti iskaratīa nia. Fetsari chipo ixii xanīfoi. A chipokōi xanīfoxiāi xanīfoi chaima. <sup>11</sup> Nā yoinā pōfe keskara ōshi ě mia yoia, ari yoinākōima, xanīfo chaka fetsa. Nā xanīfo siete ipaonifo keskara nāri chakakōi. A iyopaonikai iskaratīa anā xanīfoma. Nāskakē nāri fetsafo fe omiskōipakenakafo mēra kai anoax anā kāinakafoma.

<sup>12</sup> “Askatari nā māxo diez mī ōiai māxokōima. Nāōxō diez xanīfofo noko tāpimani. Nāfo xanīfofo iyoafoma. Chipo mani fetsafo anoax nā diez āto xanīfofo itirofo. Na yoinā pōfe keskara fe xanīfo ixikani. Askafikanax xanīfoi chai samaraka kanima. <sup>13</sup> Nāskakē nā diez xanīfofofāfe shināmisfo: ‘Na yoinā pōfe keskara nōko xanīfo iki kiki,’ ixō shinākani. Nāskakē, ‘Mī noko yoiai keskara nō atiro,’ ixō nā diez xanīfofofāfe nā feronāfake yoinā

põfe keskara yoikani. <sup>14</sup> Nãskaxõ nã feronãfake yoinã põfe keskarato nõko Ifo Jesús afe yorafoya noikaspai, xanĩfofo fetsafãferi ato noikaspaxikani. Nã yoinã põfe keskarato nã diez xanĩfofo feta Jesús yafi afe yorafo retepaikani. Retemapaifiaifono Jesús ato kanãxii. Niospa ato katoa afe yorafo kena a Ifofamisfo. Nãfãfe afara afeskarafiaito nõko Ifo kachikiri famisfoma. Nõko Ifo Jesús xanĩfo fetsafori ato ìkitiro. Nõko Ifo finakõixõ keyokõi ato ìkitiro. Akka tsõakai nõko Ifo Jesús finõtirioma,” ixõ nã Niospa ãjirinĩ ea yoia.

<sup>15</sup> Askano afianã ea yoia iskafakĩ: “Na mĩ õiai nã kẽro feromakõi keskara, fakafã femãkĩa tsoa nã fakafãkai fakafãkõima, askatari yorafo mai fetsa anoafõ, meka fetsayafo. <sup>16</sup> Nã diez xanĩfofo feta nã xanĩfo yoinã põfe keskarato nã kẽro feroma keskarakaxõ noikaspakõixikani. Keyokõichi ãfe afara fĩaxikani anã aya inõma. Nãskakẽ anã tsoa nã kẽro feroma keskara fe ipaikanima. Poomãnã retexõ koshi pikĩ keyotiro. Nãskafakĩri nã diez xanĩfofo feta nã xanĩfo yoinã põfe keskarato nã kẽro feromakõi keskara chakafaxikani omiskõimayanã. Askafaxõ chĩi koofaxikani anã ninõma. <sup>17</sup> ‘Mĩ noko yoiai keskara nõ atiro,’ ixõ nã diez xanĩfofãfe xanĩfo yoinã põfe keskara yoikani. Akka Niospa anori ato shinãmana a apaiyai keskara fanõfo. Askata taeyoi Niospa yoiyoni nã inõpokoai keskara nãskarakõi ixii. <sup>18</sup> Na kẽro feromakõi keskara mã õiai kẽrokõima, akka nã pexefã rasi Babilonia keskara. Babilonia anoa yorafo chakakõifo. Nãfãfe manifo tii anoa ato ìkinãno ato chakafakani ato keskara ikaxõ,” ixõ Niospa ãjirinĩ ea yoia.

# 18

*Ājiri fētsa yoia iskafakī: “Iskaratīa Babilonia pexe rasi mā keyoa,” ixō yoia*

<sup>1</sup> Askata anā ājiri fetsa nai mēranoax mai ano fotoaito ē ōia. Epa Niospa yoia nā xanīfo fētsari afama mīshti atiro. Nāato chaxaito maifo tii anoxō ōikani. <sup>2</sup> Fāsikōi yoia iskafakī:

Pexefā rasi Babilonia anoafō mā keyoa, anā anoma. Iskaratīa anā ano tsoa ikama, askatamaroko niafaka yōshi chakakōifo ano ika, askatari peya yōshi chakakōifori ano ika. <sup>3</sup> Nā kēro chakapa yorafo ato māmā pae ayamatiro keskafakī, nāskarifiakī nā Babilonia anoafāfe yora fetsafo mai fetsa anoafō ato afara chakafamafo ato keskara inōfo. Āto xanīfofori ato askafamafo. Askatari afara sharafos fichipaimisfo. Nāskakē a afama mīshtifo ato minimisfo, afara ichapayakōifo, ixō yoiaito ē nika. Niospa inapa askara ato yoia a Niospa keyoxiai a Babilonia anoafō.

<sup>4-8</sup> Yoikī askafatanaino nai mēranoax mekaito ē meka fetsa nika iskai mekaito:

Babilonia ano ikafāfe fāsi afara chakafakī finakōiafo. Nā afara chakafamisfo Epa Niospa ato ōia chakakōifaifāfe. Nāskakē ato omiskōimaxii. Nā Babilonia anoafāfe fetsafo afara chakafamamisfono afori. Epa Niospa ato omiskōimakī finakōixii omiskōinōfo. Nā Babilonia ano ikafāfe āto shinā mēraxō mā shināfo iskafakakī: “Nō Nios yopaima. Afara fetsafori nō yopaima. Nō isharakōimis. Oa xanīfokōi isharamis keskara nōri nāskamis, xanīfo keskara. Nōkai oa kēro

ifomafa keskarama. Nō omiskōitiroma. Askatamaroko nō isharapakenaka,” ixō kakapaimisfāfe yoimisfo. Akka Epa Niospa ato fāsi omiskōimani omiskōikakī tenēnōfoma. Akka nā ea chanīmara faafāfe, ea nikasharakāfe. Epa Niospa mā ato samamashta omiskōimani anā isharayamanōfo. Atiri ē ato namai, atiri ē ato omiskōimani, a piaifori ato kēyoi. Nāskakē fonāikani. Nāskatari atiri ē ato koofaxii kooi fetsenōfo. Tsōa atiroma keskara Epa Niospa afama mīshti atiro. Nāskakē Epa Niospa mato yoi iskafakī: “Efe yora mīshtichi, Babilonia anoafō keskara iyamakāfe. Ato fe rafeyamakāfe. Ato feta chakafayamakāfe ē ato omiskōimanai keskafakī, matori ē omiskōimanōma,” ixō Epa Niospa ato yoixii kiki, ājirinī faito ē nika.

<sup>9</sup> Askano Babilonia kooaino mai fetsa anoafāfe āto xanīfofofāfe ōikakī manoxikani. Nāfāferi Babilonia anoxō afara chakafakī tāpinifo. Nāskakē ato feta Epa Nios chakafakakī potakani afara chakafaxikakī. Nā Babilonia anoa keskarafori afāfe afama mīshti ichapa fimisfo. <sup>10</sup> Babilonia kooaino nā xanīfofo ratekōixikani chai inoaxri fet-safo mesexikani.

¡Ooa! Babilonia anoafō fato yora fetsafo keskarafoma. Mā tāpikōisharafikē samamashta Epa Niospa mato omiskōimani mā kooi fetsenō. ¡Keexto! Koshikōi Babilonia mā kooi keyoa. Nōri iskayamapainō, ixō shinākani xanīfofofāfe ratekōiyanā.

<sup>11</sup> Nāskatari maifo tii anoafō āto afama mīshtifo minimisfo oiaxikani shināmitsakani. “¡Ooa! Mā Babilonia kooi keyoa. Iskaratīa anā nōko afama

mīshtifo noko tsōa fīatiroma. <sup>12</sup> Nōko oro ōshishara fīayamata, a kerexkōi fakkai fakkaisai fīayamata, nōko tokirinī fakeshta fakkai fakkaisai fīayamata, nōko tokiri fetsa āfe ane perla fīayamata, nōko sama sharafinakōia fīayamata, nōko sama nana shara fīayamata, sama fetsa fetsatapafo fīayamata, nōko ifi nakas sharakōi fetsa fetsatapafo fīayamata, tokiri keskara kerexkōi oxosharakōi āfe ane mārfil nāato afarafo onifaa fīayamata, afe keskarara ifi sharakōifo fīayamata, firo shara āfe ane bronze fīayamata, keno fetsa āfe ane firo fīayamata, tokiri āfe ane mārmo fīayamata, nāfo kopikōifo noko anā fīakanima. <sup>13</sup> Akka nō pīchamis afama mīshtifoya osixō, nā itsa sharafoya fetsa fetsatapafoya osixō, afo noko tsōa fīatiroma. Askatari a nakas shara āfe ane incienso, fetsari mīrra, fetsari pirofomā, fetsari vinō, fetsari xini, fetsari arinā, fetsari trigo, askatari nōko yoinā inafori ovejari, kamayori, nōko karori, yonomatifori, nāfo noko anā tsōa fīatiroma. <sup>14</sup> ¡Ooa! Babilonia anofāfe nā afara fetsa fetsatapafo fichipaikakī anā fitirofoma. Keyokōi afara sharafo fichipaikakī mā fimis anā anoma mā fenokōia anā mā fipanā. Mā afaa yopakima mā fimis. Mākai anā fitiroma. Keyokōi nā mātonā mā keyoa,” ixō nā ināmitsamisfāfe yoixikani.

<sup>15</sup> Nā mai fetsa anoa fēkaxō afama mīshti minikaxō kori ichapa fimisfāfe mā noko kaxō chaima nīxō ato ōikani, ratekōiyanā, oiakani, askatari shināmitsakōikani. <sup>16</sup> Yoikī iskafaxikani: “¡Ooa! Fato fetsakai Babilonia anofo keskarama. Ato fe yorafāfe rapati sharakōifo safeafo. Rapati ōshi sharafo, askatari oro teoti safeafo, tokiri fakkai fakkaisai keskarari menexemeafo, perlari

askari faafo. <sup>17-19</sup> Koshikōi na afama mīshtisharafo mā keyokōia,” ixō yoixikani.

Nāskarifiāi nā kanōanāfā āfe ifofāfe shinākani, a kanōanāfā mēra fomisfāferi shinākani, a kanōanāfā nexa yonomisfāferi shinākani, a kanōanāfā mēra fokaxō, ato afama mīshti minikaxō kori fimisfāferi shinākōikani. Babilonia kooaito chai ixō ōikani manokakī shināxikani. “¡Ooa! Fato peXe fet-sakai Babilonia keskarama. Na Babilonia fistiōxō kanōanāfānē āfe ifofāfe kori ichapa fimisfo. Akka a aya imisfo koshikōi mā keyoa,” ixō a kanōanāfāō yonomisfāfe yoixikani.

<sup>20</sup> Askaifono keyokōi Epa Nios ika anoafō in-  
imakāfe. Babilonia anoafāfe a Jesús chanīmara  
faafo ato omiskōimamisfo, Epa Niospa ato kopikī  
omiskōimaxii. Nāskakē keyokōi a Jesús chanīmara  
faafo fe, Jesúsxō āfe meka yoipaonifo fe, a Niospa  
mekā inōpokoai yoimisfori inimakāfe.

<sup>21</sup> Akka Epa Niospa āfe ājiri fetsa mitsisipakōichi  
tokiri efapakōi fininīfofāta fakafā mēra potaxō  
yoia iskafakī: “Na tokiri kerexkai ē potai  
keskafakī, nāskafakīri Epa Niospa na peXe rasi  
anoafō Babilonia kerexkai omiskōimana kooi  
keyonō. Mā keyokōikanax anā ano tsoa ikima.

<sup>22</sup> Nāskakē anā Babilonia anoax manetifo,  
xāitifo, maneti fetsafori, afo anā tooxikama.  
Askatari anā tsoa fanāikama. Tsōakai anā  
ato nikatirofoma. Askatari a yonomisfo anā  
ano ikafoma. Askatari a aō xiki reneaifo nō  
anā nikatiroma. <sup>23</sup> Anā luzri ōtapakenakama.  
Feronāfāke kēro fiaino inimaifāfe mā nikamis  
keskara anā tsoa askara mā nikapakenakama.  
Babilonia anoa a ināmitsamisfāfe tāpikōikani.

Nãfãfe ichapakõi fimisfo. Askatari koshoiti tãpixõ yora fetsafo pãramisfo. Askafikanax mã keyoafo.

<sup>24</sup> “Babilonia anoafãfe a Niospa meka yoimisfo, fetsafori a Jesús chanĩmara faafo, fetsafori mai fetsa anoafo ato retemisfo Jesús õikaspakakĩ. Niospa meka mato yoipaiifaifono mã ato nikakas-pamiskẽ, Niospa mato omiskõimana,” ixõ Niospa ãjirinĩ yoia.

## 19

*Nios ika anoax fanãiki iskakani: “¡Aicho! Nõko Ifo Nios sharakõi,” ikaxõ Niosnoa afara sharafo fanãikani*

<sup>1-2</sup> Askata nai mẽra ikafo ichapakõi ãto meka ã nika, fãsikõi iskaifãfe:

A fetsafãfe chakafamisfo Epa Niospa ato omiskõimani. Chanĩmakõi, ato omiskõimani. ¡Aicho! Nõko Ifo Nios fãsi sharakõi. Nãato nõko chaka noko soaxona nõ afe nĩpaxanõ. Aãnoa fisti nõ yoitiro iskafakĩ: “Mĩ nõko Ifokõi. Fato fetsakai mia keskarama afara sharafamis. Mĩ sharaõxõ mĩ afama mĩshti fatiro,” ixõ keyokõichi yoipakenakafo. Epa Niospa Babilonia anoafo atoõnoa iskafakĩ yoia: “Nã Babilonia anoafo nã kẽro feromakõi keskarafõ. Nã chakafamisfoõxõ maifo tii ano ikafori ato chakafama. Nãskakẽ Babilonia anoafãfe ea fãsi chakakõi famisfo. Efe yorafori ato omiskõimakani nanõfo. Nãskakẽ ã ato kopia omiskõimakĩ,” ixõ Epa Niospa yoi, ixõ yoiaifãfe ã nika. <sup>3</sup> Afianã meka fetsari ã nika nai mẽranoafãfe yoiaifãfe iskafakakĩ:

¡Aicho! Nõko Ifo fãsi sharakõi. Afaa chakafamisma. A chakafamisfo chanĩmakõi



ato omiskōimani. Ato chiifā mēra potano afo kooi nishpapakenakafoma, ixō yoiiaifāfe ē nika.

<sup>4</sup> Askanori Epa Nios tsaoa ano nā veinticuatro xanīfori nā Nios onifani cuatro a nāmā feopakekafakī iskafakī yoiiafo: “Askapainō. ¡Aicho! ¡Nōko Ifo fāsi sharakōi!” ixō yoiiaifāfe ē nika.

<sup>5</sup> Askata Epa Nios tsaoa anoa ē meka fetsa nika iskafakī yoiiaito:

Epa Nios yonoxomisfāfe xanīfofōfāfe askatari afamafofāfe mato Niospa yoiia keskara mā apaikōimis. Māri Epa Nios yoikāfe iskafakī: “¡Aicho! ¡Epa Niosi, mī sharafinakōia!” ixō yoiiaito ē nika.

*Feronāfake āfiyakī fista atiro inimakī. Nāskarifikī Jesús nai mēraxō noko fista axoxii nokoki inimakī*

<sup>6</sup> Askatari ē anā nika yōrafā rasi mekaifāfe nā fakafā poo ikai keskara, askatari fāsikōi nai tiri ikai keskarari ē nika āto meka:

¡Aleluya! Nōko Ifo Nios tsōa atiroma keskara afama mīshti fatiro. Nā nōko Xanīfo finakōia. Maifo tii anoafo noko ĩkitiro. ¡Aicho! ¡Nōko Ifo Nios sharafinakōia! <sup>7-8</sup> Akka feronāfāke kēro fiaino nā kēro inimakōi itipinīsharatiro āfe fene fe fianāxiki. Nāskarifiāi nōko Ifo Jesús fe iskaratīa afe yorafo afe ipanakafo. Akka afe yorafo mā itipinīsharafo afe ipaxakakī. Akka āfinī āfe fene inimamapai itipinīsharatiro. Sama fena sharakōi patsaxō safetiro afe fianāxikī. Nāskarifiakī nā Jesús Ifofamisfāfe itipinīshara fatirofo. Epa Niospa ato shara fapaikī, ato chaka soaxoni Jesús fe ĩpaxanōfo. Nāskakē nō inimai. Tsoa fetsakai mia keskarama afara shara famis,

ixõ yoiafo. Niospa yorafãfe Jesúsxõ fetsafo sharafamis. Nãskakẽ Niospa ato rapati sharafinakõi safemana Jesús fe ipasharanõfo.

<sup>9</sup> Askatari ãjirinĩ ea yoia: “Ë mia yoiai keskara kenefe iskafakĩ: ‘Ëfe Fake Jesús iskaratĩa keyokõi afe yorafo ichanãfai afe ãpaxanõfo. “Niri fekãfe,” ato faino, nikakanax inimakõikani. Nãskakaxõ ãfe Fake feta pikani afe ipaxakakĩ,’ ixõ Epa Niospa yoia. Nãskakẽ Epa Nios ãfe meka mã chanĩmara fatiro,” ixõ ea yoia.

<sup>10</sup> Ea yoiaino ã a nãmã feopakekafana, “Mĩ fãsi sharakõi,” ixõ yoixiki. Ë askafaino ea yoia iskafakĩ: “Ea askafayamafe. Ëri Nios yonoxomiski mĩ axomis keskafakĩ, a Nios Ifofaa fetsafãferi askafamisfokĩ. Jesús mato yoiai keskara mã kachikiri famisma. Nãskakẽ Nios fisti nãmã nõ feopakekafã yoitiro: ‘Mĩ fãsi sharakõi. Mĩ ãfe Ifokõi,’ ixõ anori fisti nõ yoitiro. Nã Niospa meka yoimisfãfe yoimisfo keskarifakĩ ãri Jesúsnoa yoimis Epa Niospa ea shinãmanaino,” ixõ ãjirinĩ ea yoia.

### *Jesús mai ano afianã oxiai keskara yoi*

<sup>11</sup> Akka ã anã ãfe namapa õia keskara anã ã mato yoinõ mã tãpinõ. Epa Nios ika anoa nai mẽranoa ã õia. Fepoti fepekemea keskara ã a mẽra õia. Nãskara Epa Nios ika ari xafakĩakõi ã õia. Nãno kamayo oxokõi ã õia. Nã kamayo kamaki Jesucristo nõko Ifo tsoa. ãfe ane ichapa. ãfe ane rafeõnoa ã mato yoinõ. Fẽtsa, “Nã Yoia Keskara Akõimis.” Akka ãfe ane fetsari, “Chanĩmisma.” Nãato chanĩmakõi yora chakafo omiskõimani. Niospa meka nikakaspamisfono a

omiskõipakenakafo mēra ato potaxii. <sup>12</sup> Āfe fero rafe chii xofisai keskara. Fakishi chii xofisaino yōra õisharatiro. Nāskarifikā nōko Ifāfe yorafāfe āto õiti mēraxõ shināifo keskara tāpia. Xanīfāfe maiti sharakõifo ichapakõi mairafo ika. Āfe femānāki āfe ane kenea. Ares fisti nā ane tāpia. <sup>13</sup> Rapati chainipa safea. Nā rapati imiki momoa. Nāskara õikī ea shināmana Jesús noko nāxoni. Āfe ane fet-sari, “Niospa Meka,” famisfo. <sup>14</sup> Afe yorafo nai ariax kamayoyo oxokõi kamaki āto Ifo kachiori fokani. Āto rapatifo oxokõi chainipa safeafo. Nā rapati oxokõi rama pātsaxona keskarrafo. <sup>15</sup> Āfe axfa mēranoa keno chainipa ikiaikõi ē õia. Akka āfe kenoma, āfe meka. Āfe mekapas maifo tii anoafō nikayospamisfo omiskõimani. Maifo tii ato īkinā, fetsafo nikayospamisfo ato kerexkai omiskõimakõi. Āfe meka nikakaspamisfono Nios õitifishkikõini. Akka Jesúsxõ ato omiskõimani, omiskõipakenakafo mēra ato potaxii. <sup>16</sup> Jesús āfe ane fetsa āfe rapati chainipaki kenea mānākiri keneta maikiriri kenea iskafakī: “Xanīfo maifo tii anoafō Xanīfo finakõia, askatari āto Ifo finakõia,” ixõ kenea.

<sup>17-18</sup> Askatari ē õia ājiri fetsa xini ano nīxõ fāsikõi yoia iskafakī: “Xanīfofo ikaino, sorarofō āto xanīfofo ikaino, āto xanīfofo fe rafea ikaino, feronāfakefo mitsisipafō ikaino, kamayoyo ikaino, a kamayoyo kamaki tsaoafō ikaino, keyokõi Niospa meka nikakaspamisfo ikaino, ato yonomatifoma ikaino, a āto yonomatifo ikaino, yora afamafori ikaino, a yora finakõiafo ikaino, keyokõi Niospa ato namaxii,” ixõ yoia. Nāskakē ishpfifo ato yoia:

“Fekãfe ãto nami pixikakĩ,” ixõ nã ãjirinĩ ishpifo kena.

<sup>19</sup> Askatari afianã ã õia a nõko Ifo Jesús noikaspai nã yoinã põfe keskara yafi maifo tii anoa xanĩfofo ãfe sorarofoya ãfe namapa õia keskara ã õia. Mã ichanãfo Jesús ãfe kamayo kamaki tsaokẽ afe yorafoya retepaikani. <sup>20</sup> Akka ato retetamaroko Jesús ato achia chiifã mẽra ato potaxiki. Nã ato pãramisto, “Ë Niospa meka mato yoimis,” ifiax ãa chanĩmis. Nãato na yoinã põfe keskaraõxõ tsõa atiroma keskara famis Satanás yõshixõ. Nãskaxõ keyokõi yorafoki kenea nã marakkaõxõ yoinã põfe keskara tãpixikani. Nãfãfe yoimisfo iskafakakĩ: “Mĩ ãfe nios. Ë mia noi,” ixõ anori yoinã põfe keskara yoimisfo. Akka nã ato pãramisto yõra atiroma keskakakĩ afama mĩshti faito nãfãfe õiafo. Nãskakẽ ato pãrakõia. Nã yoinã põfe keskara fe nã ato pãramis naafomano iriyafi Jesús ato chiifã mẽra pota. <sup>21</sup> Nã rafeta ãto inafõ Jesús ãfe kamayo kamaki tsaõxõ ãfe mekapa ato reteaino nai fetseafõ. Mã naafono ishpifo atoki ichanãkaxõ ãto nami pikani mãyakõiafo.

## 20

### *Jesús Satanás achixõ nexaxii mil xinia*

<sup>1</sup> Askata Niospa ãjiri Nios ika ariax fotoaito ã õia, chamis keskara tsoma. Nã niafaka chakafo kinĩfã fakishifã mẽra ikafoki atoki fepoti fepoa keskara ã õia. Nã Niospa ãfe ãjirinĩ fepotinĩ ãfe chamis yafi kaninã efapa tsoma ika. <sup>2</sup> Tsomaxõ nã ronõfã keskara achia. Nã ronõfã keskara nã niafaka chakakõi Satanás. Nã achixõ nexa. <sup>3</sup> Nãskaxõ kinĩfã fakishifã mẽra pota. Potata akiki fepokõia

mil xinia a mēra inō anā yorafo pāranōma. Mā mil xinia finōano afianā kāimayoxii samarakatama chaimashta anā mai ano kafāsayonō.

<sup>4</sup> Askata xanīfāfe tsaotifo Epa Nios ika anoa ē ōia. Jesús afe yorafo yoia nā tsaoti kamaki tsaofono, “Mā yoitiro fatofomākī omiskōipakenakafo mēra foaifoma, akka fatoforimākī a omiskōipakenakafo mēra foaifo.” Askano nānoari ē ōia nā Jesús chanīmara faafo yamī ato textenifo. Ato texteyoafomano yoiyopaonifo: “Jesús nōko Ifo,” fayopaonifo. Niospa meka ifofamisfono, nāskakē ato textenifo. Akka nāfāfekai nā yoinā pōfe keskara yafi āfe nimofa yoimisfoma iskakakā: “Mī nōko ifo nios. Nō mia noi,” ixōkai anori yoimisfoma. Askatari aō ato tāpinōfo āto mēke yafi āto femānā kenemisfoma. Nāskakē nā yoinā pōfe keskara atoki ōitifishkikī ato textemani. Mā nai fetsefiafono Jesús ato otoani. Mā otokaxō Jesús feta maifo tii anoafu mil xinia yorafo tii ato ikināfo. <sup>5</sup> Nāfo mā otoafono mā mil xinia keyoano fetsafori Epa Niospa ato otoaxii. <sup>6</sup> Shinākapo efe yora mīshtichi, mato yoiai keskara. Noko Epa Niospa ofofakī taefaxii. Noko katonī afe yorafo nō inō. Epa Nios feta Cristo noko yoiai keskara nō fetsafo Epa Nios kīfixomis. Nō omiskōifikatsaxakī Jesúsnoax omiskōifikatsaxakī naax nō omiskōipakenafo mēra kanakama. Askatamaroko Cristo ika anoxō a feta fetsafo nō ikixii. Nāskakē Jesús keskara shara ikax nō fāsi inimaxii.

*Satanás kinīfā chaikōi mēranoa kāimayoi anā yorafo pāranō. Ato askafaino koshikōi anā kinīfā mēra potaxii anā kāipakexanōma*

7-8 Askata mā mil xinia finōano Satanás kinīfā fakishifā mēranoa anā kāimayoxii anā maifo tii anoafō ato pārayonō. Askata mā kāixō nā Nios nikakaspaifo maifo tii anoafō ato ichanāfai nā Niospa yorafo ato retemaxii. Ichanākani ichapakōifo. Nā Nios nikakaspamisfo tsōa ato tanātiroma. Gog anoax fekāta, Magog anoax fekāta, ikanax ichanāfo Nios nikakaspamisfo. <sup>9</sup> Maifo tii anoafō ato ichanāfaxii Niospa yorafo ikafo anoafō ato cheteakenōfo ato retexikakī. Ato askafaifono Epa Niospa afe yorafo noikī ato ifixii. Nā yorafo Satanás ichanāfaa ono nai mēraxō atoki chiifā potano nai fetsekani anā tsoa pishta ninakama. <sup>10</sup> Akka nā Satanás niafaka chakata yorafo feparamiskōikē Epa Niospa chiifā mēra pota. Nā taefakī nā yoinā pōfe yafi nā ē mato Niosnoa mato yoimisra iki a chanīmis ato mērari Satanás niafaka chaka Epa Niospa pota. Nā tii chiifā mēranoax omiskōikani xatenakafoma.

*Jesús chanīmara faafoma ato omiskōimaxii*

<sup>11</sup> Askata xanīfāfe tsaoti oxokōi efapakōi ē ōia. Nāno Epa Nios tsoa. Akka mai fe nai anā ano ikama. <sup>12</sup> Askata ē ōia nā xanīfofo fe nā yora afamafori nakanax Epa Nios tsoa ano ni-afo. Nāno niafono Epa Niospa āfe kirikafo fēpea. Kirika fetsari fēpea. Nā kirikaki nā Ifofamisfo atoki kenea. Akka a Ifofamisfoma atoki ke-neama. Akka nā kirikanā āfe ane Nīpamisfo. Nā nayoxoma apaonifo keskara kirikafo mēra keyokōi Epa Niospa mā keneni. Nāskakē nā afara chakafapaonifo keskara atoki kenexō ato ispai tāpinōfo chanīmakōi ato omiskōimaxii. <sup>13</sup> Nā āsamisfo fe mai anoax namisfori askatari fetsafori

nafiakanax otoyokanima keyokōi namisfo Epa Nios āfe ferotai fi feafo. Nā chakafamisfo tii Epa Niospa ato omiskōimapakea. <sup>14</sup> Keyokōi nā Niospa meka nikakaspamisfo Epa Niospa ato chiifā mēra pota. Mā nafianifono iskaratīa afianā ato chiifā mēra potaito ē ōia. Nānoax omiskōikani xatepakenakafoma. <sup>15</sup> Akka nā kirika āfe ane “Nīpamisfo” a mēra Epa Niospa āto ane kenemisma, nāfo chiifā mēra pota. Nāskara ē ōia Epa Niospa ea ōimanaino a ixiai keskara mai keyoaino.

## 21

### *Nai yafi mai fenakōi Epa Niospa onifaxii*

<sup>1</sup> Akka nā ēfe namapa ōia keskara Epa Niospa anā ea ōimana. Ē ōia nai yafi mai fenakōi Niospa onifaa. Nā nai yafi mai taefakī onifani yamarisatana. Fakafāri yamarisatana. <sup>2</sup> Askano ē ōia Niospa yorafo nāfāfe Jesús Ifo shara famisfo nai mēranoafo Epa Nios ika ariax fotokani. Nāfo ikafo Jerusalén fena ano. Nā Jerusalén fena Nios ika ariax nāmā fotoa nāno ikafo. Fotoaifono ē ōia fāsi sharakōi. Akka kēromā āfe sama sharakōi safetiro itipinīsharaxikī fene fe fianāxiki. Nāskari fakī Epa Niospa nā Jerusalén fena itipinīshara faa sharakōi inō afe yorafo nāno afe nīpaxanōfo. <sup>3</sup> Askano Epa Nios tsoa anoa meka achakōi ē nika. Yoia iskafakī: “¡Aicho! Iskaratīa Epa Nios yorafo fe ixikiki. Ato mēra ixii nāfo afe yorafo inō, nā yora fisti keskara. <sup>4</sup> Ato kexesharaxii anā tsoakai omiskōitiroma. Ato noikī oiaifono Epa Niospa ato shināmasharaxii āto fēo tereaxoxii anā shināchakakakima tanaima inimanōfo. Ato kex-eaino tsoakai anā natiroma, anārikai manomitsai

oiakanima, anārikai paemekanima. Afara chakafo iyopaoni keskarakai anā askanakama,” ixō yoia.

<sup>5</sup> Askata Niospa āfe tsaoti kamaki tsaoxō yoikī iskafaa: “Ē keyokōi fenafai,” ixō Niospa yoia. “Ēfe meka chanīmakōi. Nāskakē nā mī nikai keskara kenefe,” ixō ea yoia.

<sup>6</sup> Askaxō anā Niospa ea yoia iskafakī: “Mē aka. Iskaratīa ē yoiyoni keskara mē keyoa. Afara onifataima ē iyopaoni. Afetiara maifo tii keyoai eres fisti ē yoitiro. Ē keyokōi īkinā. Ēfi nīpamiski. Fetsa nōamāikī yoitiro iskafakī: ‘Ē faka fenakōi naxikima,’ ixō yoitiro. Nāskarifiiai fetsa ipaisharapaikōikī yoitiro iskafakī: ‘Ēa ē isharatiroma. Ē Nios yopakōi,’ ixō anori yoiaito ē inimakī ifitiro, efe ĩpaxanō. <sup>7</sup> Fētsa ea kachikiri fatamaroko nā naitīa ea Ifofasharaxō nāto keyokōi nā ē mia yoia keskara fixii. Ē kaxpa ināxii. Ē āfe Nios ixii. Akka ēfe fake ixii. <sup>8</sup> Akka fetsa ratei eōnoax omiskōikaspakī ea kachikiri faa, askatari fētsa ēfe meka nikakaspamis, fētsari afara chakafo fetsa fetsatapafo xatekaspai, askatari fetsari retemitsamis, fetsari āto āfima chotamis, askatari kēromāri āto fenema chotamamis, fētsari koshoiti tāpiax nā niafaka chakafo fe rafemis, askatari fētsari ea noitamamaroko afara fetsa noikī, ‘Na ēfe nioski,’ famis. Nāskakē askarafo fe nā chanīmisfo afokai efe nīpanakafoma. Chiifā mēra nā omiskōipakenakafo mēra ipanakafo. Anoaxkai faki fonakafoma,” ixō Ēpa Niospa ea yoia.

### *Jerusalén Fena*

<sup>9</sup> Askata Niospa ājirinī siete kecho keskara mēra afara chakakōi fospia maifo tii ano nachixii ato



omiskōimanō fētsa ekeki oxō yoikī iskafaa: “¡Ofe! Ë mia afara sharakōi ōimanō. Akka feronāfāke mā āfiyaxō kexesharatiro. Nāskarifikā Jesús chanīmara faafo afe yorafo ifia. Ofe. Ë mia ōimanō,” ea faa. <sup>10-11</sup> Askano Niospa Yōshi Sharapa ea ĩkināino Niospa ājirinī ea machi efapa keyakōi ano ea iyoa keyokōi ē ōinō. Jesús chanīmara faafo nā Nios ika anoafoto chaka soaxona nāfo nai mēranoa Epa Nios ika ariax fotoaifāfe ea ōimana. Na māchifā keyakōi anoxō ea ōimana. Nāfo ika ano āfe ane Jerusalén Fena. A mēra ikafo Jesús Ifo shara famisfo. Epa Niosri ato fe ika. A ato fe ika ano fakkai fakkais isharai. Tokiri fakkai fakkais ikai keskara sharafinakōia. Nā tokiri āfe ane jaspe fēxta shara, tokiri fetsa āfe ane cristal. Shara fakkai fakkais ikai keskara. <sup>12</sup> Nā tokiri kenea efapa Jerusalén foake tii fayakena. Nā kene keyakōi doce fepotiya. Nā doce fepoti ano Niospa ājiri niafo kexesharaxikā. Israel iyopaonito āfe fake doce ipaoni. Nā docefāfe āto fakefo paxkanifo. Nāskakē fepoti tii āto anefo doce kenea. <sup>13</sup> Nā kene keya āfe fepoti ichapaya. Xini oaikiri tres ikaino, xini kaikiri tres ikaino, xini kaima anori tres ikaino, xini oaima anori tres ika fepoti ichapaya. <sup>14</sup> Nā kene keyakōi tokiri doce efapanāfā kamaki kenea. Jesúsnoa yoimisfāfe āto anefo nā tokiri doceki kenea.

<sup>15</sup> Niospa ājirinī nā ea taefakī yoiato, nāato tanati oro tsoma, Jerusalén Fena tanaxii, āfe kene yafi āfe fepoti tanaxiki. Nā tanati tafa chainipa keskarafix oro ōshi keskara sharakōi. <sup>16</sup> Nā Jerusalén Fena āfe kene keya senēsharakōi. Āfe chainipa fe āfe xākī nātixō rafe. Āfe keyari nātixori.

Niospa inapa tana dos mil dos cientos kilometro ãfe chainipa fe, ãfe xākī, ãfe keyari. <sup>17</sup> ãfe kenefo keyakōi a akiki kenea sesenta y cuatro metros. Nã Niospa ãjiri yorafãfe tanamis keskari fakī nãatori metropa tana.

<sup>18</sup> Nã Jerusalén Fena sharakōi. Nã manishomo fēxta nō ōimis keskara sharafīax ōshi keskara. Nãōxō Epa Niospa Jerusalén Fena onifaa. Askatari a kenea keyakōi nã tokirinī ãfe ane jaspe Niospa onifaa. <sup>19</sup> Tokiri sharakōifo fetsa fetsatapafa Epa Niospa onifaa, nã doce tokiri kamaki nã kene keya tsaoa. Taeyoi jaspeki iyoa. ãfe pefeta zafiroki ika. ãfe pefetari agataki ika, ãfe pefetari esmeraldaki ika, <sup>20</sup> ãfe pefetari onīceki ika, ãfe pefetari cornālināki ika, ãfe pefetari crisolitoki ika, ãfe pefetari beriloki ika, ãfe pefetari topacioki ika, ãfe pefetari crisoprasaki ika, ãfe pefetari jacintoki ika, ãfe pefetari amātistaki ika; nãfo sharakōifoki nã kene Epa Niospa nimainīfofāni. <sup>21</sup> Nã kene keyapa ãfe fepotifo perla oxo efapa Niospa onifaa. Nã perla tokiri keskara oxo sharakōi. Nã perla fistiōxō fepoti fisti onifaa. Nãskakē doce fepoti onifaa nã perlaoxō. Nã Jerusalén Fena ãfe fai manishomo fēxta sharakōi keskara oke rafe nō ōitiro. Manishomo fēxta keskara sharafīax oro ōshi keskara shara.

<sup>22</sup> Akka Epa Nios kīfiti pexefā anoma. Epa Niospa nã afama mīshti fatiroxakī nōko Ifo Jesús noko fe Jerusalén Fena mēra imisfo. Askatari yorafãfe Epa Nios kīfiti pexefā nã anã yopanakafoma. <sup>23</sup> Nãskarīfakī anã xini yafi oxe yopakanima Epa Nios fe Jesús ato fe ikano. Epa Nios nãno ato fe ixō ato chaxaxoni. Jesúsri ato

askafaxōi ōisharakōinōfo. Anā afaa yopakanima.  
<sup>24</sup> Mai fetsa anoaxri fofāsatirofo Epa Niospa ato chāxano. Xanīfofori Jerusalén Fena mēra ikikaxō a aya imisfo afara sharafo ināxikani. <sup>25</sup> Nāno fakishri anā ikima. Fakishpakenakama. Akka anā Jerusalén Fena āfe fepotifo fepopakenakama. <sup>26</sup> Akka fetsafori maifo tii anoax Jerusalén Fena mēra ikikakī a aya imisfo ato afara sharafo ināxikani. <sup>27</sup> Akka afara chaka nā Jerusalén Fena mēra ikitiroma. Nā chaka shināmisfo fe a afara chakafamisfo, a ato pāramisfori afo ikitirofoma. Akka Jesús āfe kirika mēra āto ane keneano afe ipaxatirofo. Nāfo fisti Jerusalén Fena mēra ikitirofo Jesús fe ipasharaxikakī.

## 22

<sup>1-2</sup> Askano ēfe namapa ōiai keskara Niospa ājiri fētsa ea ōimana afe keskaramāki Nios ika ano. Nios fe Jesús tsoa anoax faka shara fakkai fakkaisai keskara kafani, fai nēxpakīa. Afara choshta a mēra ikitiroma. Nāno ikafāfe nā faka shara aya-paiyaitīa ayatirofo, nāskakē nomipakenakafoma. (Nāskarifiakī nāno Niospa noko potapakenakama noko ikipakenaka.) Nānori fai nēxpakīa ifi nia ika. Faka takai raferi nii xokoa ika. Nāno ikafāfe nā nii fimi pipaiyaitīa pitirofo. Nāskakē fonāipanakafoma. Nāskarifiiai Nios nofe ikano nō aōnoax omiskōitiroma nō nisharapakenaka. Nā ifi oxe tii fimimis. Āfe pei tsasimisma xachoko fena shara ipanaka. Nāskarifiiai nā chanīmara faafo tii maifo tii anoax Niosnoax meema sharakōi ipanakafo. <sup>3</sup> Nā Jerusalén Fena ano Epa Nios fe Jesús nofe ixii. Nō ato fe yorakōixō nō ato noikōixii.

Nõ ãto yonoxomiskõi nõ ixii. Atoki fanãisharayanã nõ ato yoisharapakenaka. Akka nõko mai xini ano afara chaka fetsa fetsatapafo imis. Akka iskaratĩa nã Jerusalén Fena ano afara chaka a mēra itiroma. <sup>4</sup>Nãnoax nõko Ifo fe ãfe femãnãki õinõnãfãfãixikani. Æto femãnãki ãfe ane ato nētamana. <sup>5</sup>Nõko Ifo Nios ari ikafo ato penafaxõa. Nãskakē anã rãpari yafi xini yopatirofoma. Anokai anã fakishima. Nãskax afe xanĩfo ipanakafo.

### *Jesús chaima oi*

<sup>6</sup> Askata Niospa ãjirinĩ anã ea yoia: “Nõko Ifo Niospa ãfe Yõshi Sharaõxõ a ãfe meka yoimisfo ãto õiti mēraxõ ato tãpimamis a afara afeskara ixiai keskara afe yorafori ato tãpimanõfo. Nãskarifiakĩ iskaratĩa ãfe ãjiri fetsa nĩchia afara afeskara ixiai keskara a yonoxomisfo tii ato tãpimanõ. Nã ã mia yoiai keskara chanĩmakõi. Keyokõi ãfe meka mã chanĩmara fatiro,” ixõ ea yoia.

<sup>7</sup> Akka yoikĩ iskafaa nõko Ifo Jesús yoia iskafakĩ: “Ë nai mēranoax mai ano matoki nokorisai. Nã mã õia a inõpokoai a mã nikafori, nãfo mã kene-tiro. Akka nãfo chanĩmara fakakĩ kachikiri fayamakanax inimakõixikani,” ixõ Jesús ea yoia.

<sup>8</sup> Ëkĩa Juan ã nika, askatari ã õia ea Niospa ãjirinĩ õimanaino. Nãskakē ã a nãmã feopakekafana ãfe Ifo keskara shinãi. Nãskaxõ, “Mĩ fãsi sharakõi,” ã fakerana. <sup>9</sup> Ë askafaito ea yoia iskafakĩ: “Ea askafayamafe. Ëri mia keskaraki. Mĩ ikaino, Jesús chanĩmara faafo ikaino, ãfe meka yoimisfo ikaino, keyokõi nã mã rama kenea keskara chanĩmara

faafo fe, ěri mato keskara nōko Ifo Nios ě yonoxomis. Akka Epa Nios fisti mĩ Ifofatiro. Nā fisti nāmā mĩ feopakekafatiro,” ea faa.

<sup>10</sup> Askata afianā ea yoia iskafakĩ: “Nā mĩ kenea oneyamafe. Nā mĩ kenea keskara samama askakōi. Nāskakē a mĩ kenea keskara keyokōi yorafāfe tāpinōfo. <sup>11</sup> Akka mā Jesús nokoaino nā nikakaspamisfāfe chakafakĩ finakōixikani. Yora chakafamisfāferi nāskari faxikani chakakōi fakakĩ. Akka nā Niospa yoiai keskara amisfāfe nāskarākōi fakakĩ mimakōi faxikani Niospa yoiai keskara akakĩ. Nā Jesús keskara shara imisfo nāfori isharakōixikani āto Ifo ifosharakōifakani,” ixō Niospa ājirinĩ ea yoia.

<sup>12</sup> Nāskaxō Jesús anā yoia iskafakĩ: “Ea nikasharakāfe. Ě matoki samama nokorisai. Nokoxō ě mato yoiyoa keskara ě mato ināsharaxii. Nā afara shara famisfo ě ato shara fata nā afara chakafamisfo ě ato omiskōimaxii. <sup>13</sup> Afarafo onifataima ě iyopaoni. Ěfi nĩpamiskĩ. Ě niixatepakenakama. Nā māto mai keyoai eres fisti ě yoitiro,” ixō ea yoia.

<sup>14</sup> Anā Jesús yoia iskafakĩ: “Nō Jerusalén Fena mēra ikixō, nā ifi āfe fimi pipaiyaitĩa nō pitiro. Nāskarifiāi nō Epa Nios fe ikaino ares fisti noko nimapakexatiro. Nā Jesús chanĩmara faafo ato chaka soaxona nāfo fisti Epa Niospa ato ikimatiro afe ĩpaxanōfo. <sup>15</sup> Nāskakē nā yora chakakōi paxta pōfe keskarāfo fe, a koshoiti tāpiafo, nā koshoiti chanĩmara faifori, feronāfāke āfe āfima chotamis, kērofāferi āto fenema chotamamisfo, retemitsamisfori, Nioskōima noikĩ ifofamisfori, chanĩmisfori,

nā chanĩ noimisfori, askara yorafokai Jerusalén Fena mēra ikitirofoma.

<sup>16</sup> “Ēkĩa Jesús, ěfe ājiri matoki nĩchia ě mia yoia keskara nā ea Ifofaafu tii ichanāfo anoxō ato tāpimanō. Ēkĩa David āfe fena. Ēfi nā fishi efapa penaino ōimisfo keskarakĩ. Nā fishi ōikĩ nō tāpitiro mā penaino. Nāskarifiiai mē chaima oaino tāpikanax itipinĩsharatirofo Jerusalén Fena mēra efe ipaxakakĩ,” ixō Jesús ea yoia.

<sup>17</sup> Askano Niospa Yōshi Shara feta Jesús afe yorafāferi yoikakĩ iskatatirofo: “Jesúski fekāfe,” ato faifono, fetsafāferi nikakaxō ato yoitirofo: “Jesúski fekāfe,” ato fatirofo. Fētsa nōamā ikĩ faka yopai, faka ano katiro mā ayax anā nōamā itiroma. Nāskarifiiai fētsa āfe chaka xatepai, Jesúski otiro Epa Nios fe ipaxakĩ. Afaa inātama Jesús chanĩmara faax, afe ipaxatiro.

*Juan mā mekai xatekĩ Jesús yoiai keskara keneni*

<sup>18</sup> Ēkĩa Juan, afara ixiai keskara ě mato kenexona. Ē mato kenexonai keskara chanĩmakōi. Nā meka ě mato yoiai nikasharakāfe. Ē mato kenexona keskara akka fētsa afianā meka fetsa shinākĩ keneax, na kirika mēra kenea mā ōiai keskara omiskōipakenakafo chanĩmakōi Epa Niospa keyokōi nāfo omiskōimaxii. <sup>19</sup> Askatari a afara afeskara ixiai keskara ě kenea fētsa na meka atiri soakē Epa Niospari āfe ane soaxii āfe kirika mēranao. Nāskakanax nā Jerusalén Fena shara mēra ikitirofoma. Ē kenea keskara soakanax nā Epa Nios afara shara yoiyoni keskara, aya ipanakafoma.

<sup>20</sup> Jesús yoia keskara nānori ě mato kenexona. Nāato yoikĩ iskafaa: “Chanĩma, ě matoki samama

nokorisai,” ixõ yoia. Askapainõ. Nõko Ifo Jesús orisapainõ.

<sup>21</sup> Mã Niospa yorafo. Afara afeskara afiaino nõko Ifo Jesús mato noixõ mãto õiti mato fẽpeaxosharapainõ. Askapainõra. Êri mato fãsi shinãi. Nã tií.

*Êkã Juan*

**Niospa meka fena Jesucristo<sup>noa</sup>**  
**New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



2018-11-16

---

PDF generated using Haiola and XeLaTeX on 13 Jul 2024 from source files  
dated 29 Jan 2022

6c7b7ce2-9d87-5405-91e6-71ce1387adcc